

青神縣志卷四十八

記志

明

遊玉蟾寺記

余承勛

玉蟾寺古剎也揖眉負研襟帶乎青衣仁壽四郡邑之交也環而步之皆百里許故鮮乎遊睨者寺無聞矣楊子和之田居鄰之常新其佛宇誦其勝於余且環寺皆山也僧不耕種桃爲業桃花時連崗絕嶠霞錦爛空下臨澗洞落英溺雨緣溪褰裳而採者宛乎桃源之窈窕也登其佛岸則雙石崛起

青神縣志

卷四十八記

一

天門洞開不扃不鑰游氣往來探其幽閒宛乎若中巖石笋之秀窟也歷其中僧居雜構聯絡林巒十餘里望之香霧繚迴丹台翠宇隱然居嵐光蜃氣中僧家所謂銀色世界者玉蟾之稱豈象於是也耶復有懸洞如屋猿狖所居斷碣飛梁望之莫卽是則玉蟾數百年舊物山靈護以爲寶者也吾子素愛山水獨茲遊遲焉豈僻而無聞遠而遺耶甲午孟夏遂拉楊子與二三同志者訪焉於斯桃已實矣窮其源松蘿繁邃泉石紆詭捫虛架深莫識名所及憇其石笋也仰峭舊之灑芬掬靈根之積澤仙翁釋子往採芝斲苓以爲樂而不自

知之此則玉蟾之至趣楊子固不及焉豈所見勝於所聞也耶是夕也涼飈濯暑明月湛空林影散地鳥鵲喧動乃與其遊者脫巾躡履觴於石筍之下命調拊琴響振幽谷曲終醉卧於松露嘆曰玉蟾信美何求聞於世哉幸遭人而聞亦數也是故服竒藝者晦名懷眞節者韜跡敦俊美者致遠契嘉會者昭遺士君子出處之慎交遇之難概類乎此也遂作玉蟾桃李石筍詩三篇雲根二大字併付會松上人磨崖壁刻之楊子曰玉蟾入子記寺自今有聞矣其同遊者姓氏在詩刻

眉山蘇氏祀田記

余承勛

眉山舊有三蘇先生祠累禩弗治堂廡閉墉日聽於敗而已嘉靖庚寅侍御邱君道隆按部眉山謁其祠周覽弗稱乃謂大參趙君淵僉憲戴君亢曰設堂室以祭者薦其義也祠敝而薦知弗享也乃命莫守鈍取他毀祠之材拓治之規貌緣飭視昔益宏麗矣又命求老泉墓於武陽可龍里弗得因割其落陽等九寺及孝思佛堂田若干畝爲蘇祠祀田乃曰古置守塚今老泉墓失所在矣聞杭多東坡後人能招之來力田以奉祀焉庶幾乎守塚義也議未舉侍御去矣憲學張君

鯤黃君祺參伯何君鰲張君璉僉憲鍾君錫先後力行之自江津得蘇學者持所藏東坡小像來辨其手翰考其譜繫則穎濱後也僉曰遠者莫可致但信其爲蘇氏已矣遂以請於中丞宋有台公滄曰表裔象賢求田永祀訓世令典也其許同下執事已而侍御熊君爵朱君廷立繼來謁祠下學以祀田星散不可業爲辭乃許以計畝受貨別易腴田之邇祀者求有司丹券以存厥典莫守謂勛里人願學先生者乃屬之記制曰百辟卿士有益於民者祀之若蘇氏父子兄弟履常爲經濟蹈變爲忠貞貫六經以爲藝極者均之宋鉅儒名臣

去今四百禩餘矣後之人誦詩讀書以想慕其父子兄弟之爲人則流風餘烈尙足爲天下後世之宗師焉顧弗可祀也哉然祀之義有二一曰報功一曰修先今之寓祭於田寓子於祠者所以報功也古之有田則祭無田則薦所以修先也報功以勉力修先以崇恩仁人孝子兼而舉之祀事焉則上以順於鬼神外以順於君長內以孝於親庶幾乎盡祀之義也已矣先是吾蜀司馬李公克嗣巡撫河南亦嘗求東城穎濱墓穎上爲俱置祀田取後人自杭守之未幾鬻其田歸矣是豈當路崇古報功意哉故_古修先有厚貨買墓前田三農

之月輒束帶垂泣躬自耕墾學之祀田則出於有司不費而享其百夫之產先子之賜也其念厥祀義尊本敬始世守其田勿失無若杭之人可矣老泉族譜記曰多取其先人之資田而欺其諸孤子也孝弟之行缺况祀田乎况祀田乎雖然上世無祀田後乃合墓下子孫之田計數而割之皆立約聞官不得鬻敢效茲義勒祀田之數與四至於碑陰

修復老泉先生墳祀記

余承勛

嘉靖壬子春臺史汝南俞公時按部眉山夜夢與東坡先生接因謁三蘇祠爲文祭之嘆曰東坡穎濱塋於吾鄉之汝穎

間墓至今存也惟老泉先生塋於眉山故墟按歐陽公誌墓在武陽之可龍里豈爲人滅其跡久而無所考耶遂命其守楊候秉和上下彭眉間求之竟弗獲議者謂東山十里廣福寺者相傳爲老泉勅賜守塚之寺也卽其地封而祠焉弗愈於終亡已乎不然穎濱墳院記有之廣福爲先公文安府君墳側之精舍也距墳四里許翁初卜塋得安鎮之山有泉曰老翁井墳距泉西南只十餘步爾今之求老泉墳者舍寺而求諸泉近之矣俊乃度方里以諮其泉遂得之於石龍東岸之柳溝山中其山壯偉環抱泉坌然出於兩山之間畜爲井

翁謂塋書協吉爲神之居其信然哉乃復得聯槩於山楹之下雖無理辭翁祭程夫人文惟子之墳鑿爲二室徵夫泉與穴信乎爲老泉遺塚也若石龍者適在彭眉界中豈可龍相傳之誤耶侯因諭居民我弗爾罪圖別址以徙爾居我將治泉穴構祠宇乃封乃樹申樵採之禁於守塚焉庶老泉之靈爽栖於此矣遂約其勞費以聞於台史從之未幾祠成侯屬承勛記其事仰而嘆曰老翁井僻泉也自老泉而有聞焉今老泉墓泯矣據老翁井而復得之翁之井銘曰惟我與爾遂終不泯翁與泉何異世相遭之奇也哉說者謂東坡穎濱若

歸祔翁所謂庚壬之穴則翁之墓至今存可也不然老泉嘗欲卜居河南貧不能遂二公蓋承其先志者今二公塋域中亦有小眉山山西望驀颯風景不殊又安知老泉之靈不往來遨遊於汝穎間耶至三蘇氏之所以存者歐陽公銘曰偉與明允亦既有文而又有子故其父子兄弟一時文名震京師其終也忠愛孝悌之節率可以表見於天下後世其存而不朽者在是矣又豈繫於一抔之土爲蘇氏有無輕重哉若夫台史之文章氣節視蘇氏異代而齊光者故其感契之深寓諸夢寐極意而推表之矣嗚呼佳城見白曰而滕公塋峽槩

墮而王果復營斂之今老泉之廢井亦幾五百年而遇臺史封其祠焉非異數也乎翁諱洵字明允號老泉其詳在宋史傳茲故畧是舉也憲伯陳公常道楊公守約參伯鄭公光溥學憲陳公鑿光先後贊成之若吾鄉之少卿吳君嘉詳憲副弟承業亦嘗與泉諮焉謹錄以爲記

中巖記

熊相

正德戊寅余南巡至青神宿下巖明日登水月樓時白露橫江水天一色峩眉諸峯近若几案心目覺怡曠又明日行半里至喚魚池花竹如繡澄潭一泓崖嶺詩刻佳者讀之令人

青神縣志

卷四十八記

六

肯首其可嘆者不覺撫掌池魚驚駭遊躍若助余之興又半里至穿雲洞門如屋其深莫測壁間刻頭陀像夜間有人見光者蓋山川靈氣初不足異又數百步至玉泉崖覆如屋泉出崖之東西兩石龍吞吐之噴若濺珠殊可愛亭午至中巖宿距羅尊者閣如深洞然四維懸崖飛鳥不能越而當面一壁直立千仞久視之增人氣魄明日遊上巖不一里過伏虎□上多古今名筆入石峯一石而中分若一字然中有尊者像塑自唐人峯之東石平若臺多古今墨刻蓋三巖絕佳處也

修復越雋東路記

余承勛

越雋當西南夷孔道自

武漢

鑿靈山橋遜水以通邛笮厥後孔

明渡瀘南征隋史萬歲由石門以通南詔唐韋臯置青溪關以和羣蠻所出雖異而石門青溪則今黎雋扼塞皆謂之南征道也然關梁徒治邊計益嚴故遠人涉險阻犯瘴癘穿番落一綫而路焉鮮弗難且病矣嘉靖己亥冬憲使富公好禮按部黎雋間備豫之暇察山川險夷寒暑之災祥凡可幹利害綏遠人者咸經理之弗遺乃謂大渡河古瀘水也孔明嘗五月渡瀘維其時災濤噴霧禽獸避匿雖軍書驛騎交馳於

津堠間亦必俟暑退瘴消而後敢渡河通走集焉相公嶺亦號自孔明鳥道盤空雪霏晝暝俯其中黷箐驚湍諸番每乘以爲亂故非哨期則羣百數十人弗敢過也嗚呼天塹鬼關動遭不測議邊者顧弗思以處之何耶於是請於當路中丞李公欽侍御董公珊曰國初景川侯曹震來畧蜀謂是古驛道以通越雋盖利其風候宜人番酋嚮順履坦而道里捷爾今廢道之陳跡尚在盍圖而治復之僉曰審邊土利害而趨避之善籌邊者也富公乃命寧越指揮丁鼈者率諸邊士自嶺西之首塗隨山刊木緣獾狽之境而東之斬關有遺戍絕

谿有遺梁標界而編織種落有遺虜約費省勞故不數月而遂達於峩眉之麓爲通達矣後復量程遠邇經度宿衛而嚴夫善後計焉凡爲戍堡五曰小音薩曰黑麻溝曰一碗水曰板房曰金口爲公館四曰舒快曰老木坪曰獾狃曰射箭坪堡館間置連絡三百餘里每堡徙越嵩衛軍十人每館設馬五匹箭坪則編峩眉民夫五十人獾狃則土民五十人舒快木坪則各越嵩軍二十五人仍各置一人總領之以防守焉若兵械火鑲供帳什器之類所在靡弗備設有警則聲授相望害遠而近蒙利焉故八樂趨之至大渡河故道弗敢閉亦

弗敢失守若古黎之南北二路惟遠人審趨避焉爾或曰天設之險謀恐未足以勝之是路也乃謂審利害而趨避焉果天邪人邪不然籌之計創始難克復亦弗易苟弗易爲力而盡力焉若臯之治復石門道者天實相之患後之人畏難無所於述焉爾是故天寶中李白作蜀道難篇以嚴武寓天險也陸暢更作蜀道易篇以美韋臯寓人謀也求之乎美刺之實則蜀道之難易在人弗在天也人謀弗可以勝天險乎富公則臯之儔也經畧西南疏濬不閉治道乃其一端爾故樂爲記之以俟議邊者

文昌宮田碑記

林 鴻

青邑自康熙六年並縣治歸眉一切學校井疆不過眉一大村落耳不無鞭長莫及動人邱墟之感且自兵燹後邑乘無稽古老無存豪强者恣其蠶食如文昌宮田被玉蟾寺僧所佔其明徵也自雍正七年縣治復設於是一二稽古之士如黃帝錫等修學校建文昌毅然復古自任而文昌宮田仍爲

青神縣志

卷四十八記

十

僧據爰及總理雷發應歷顛情於程公劉公吳公劉公賦歸隱程公吳公俱蒞任未久且至軍需旁午故案懸未結余自庚午來蒞是邦眾亦顛情余閱卷有斷碑半紙雖模糊不可讀然有文昌宮數字至寺索碑已爲僧所滅遂責逐之乃另募住持將山場田地平分半入文昌宮半爲僧燈火各載條糧一錢零使无侵佔嗚呼諸多土培風振俗於文昌宮田拓而充之則祭菜鼓篋莪之菁棫之芄正未有艾也余不能無厚望焉

修鴻化堰記

林 鴻

庚午夏余奉

命來蒞茲土竊見東南多水耨西北盡火耕心竊疑之爰稽邑乘而邑乘無傳及閱通志眉志因知有鴻化堰者陂堰七十二道厥利甚溥創於唐淤於明宜其陸海無稱焦土堪憐也夫歲月遞更滄桑代變古今來事蹟之泊沒弗稽者何可勝數雖有好古之士亦徒歎息於荒蕪蔓草中也豈獨一堰哉雖然歌臺舞館識其名可也仙跡佛場留其勝足矣若有裨於民生有關於國計有其舉之莫敢廢也而顧因其久煙遂漫不經心概不尋討不則師心穿鑿迄於無功坐令美利不興善

青神縣志

卷四十八記

十一

政不復非民牧之咎而誰咎歟予繹李冰深淘灘低作堰六字而悟爲堰之道因率故老爰究爰度見有傍山而屹然屏立者寬不數武儼若堤形予曰鴻化堰之猶有可稽者其在斯乎自是而鋤者插者峙畚輦者手拮据者約數百人不三日而得石底不踰日而堰身見更不踰月而堰口呈故老曰此天以故道恩使君而使隳於數百年興於一旦也余曰此國家之福也爾民之幸也方今

聖天子胞與爲心 各大憲痼瘵在念兢兢焉以興修水利爲急務余亦體此物此志以師古之智行古之道耳何能之與有

抑猶有說焉天道有否泰氣候有剝復人事有革鼎信乎成敗興廢時也數也有莫之爲而爲之者不然鴻余名也胡爲以鴻名且曰化若埃鴻而化也者是其於創始之日若預卜鴻之來必不忘斯堰而堰之必自鴻而化也卽余亦不自知之矣計堰週身若干丈長若干里溝寬若干尺堤用石礮者幾多丈用竹石壘者幾多丈計畝出資不支帑項其費幾千金經始於癸酉年之夏落成於辛巳年之春倡修者紳士某某董事者典史某農民某堰長某督催者胥役某某節砌者石匠某也美哉汨汨乎其來也淼淼乎其溢也泱泱乎變礲

瘠爲窪沃化陵阜爲塗泥也厥功鉅矣夫豈一朝一夕之故哉爰歌以誌之曰何年涸龍卧北臯雲霓瞻望空號啣我陟岡陵頻首搔苦無志乘心怱怱八載荒度擊其罄股無肢兮脛無毛引得活水湧波濤習坎**滯**至堪容艚底用轆轤料棹蒔秧饁餉汗弁髦歲歲秋潦勤洗淘箒車穰穰酌香醪改修鴻化普興兩堰記

王承熾

自天時之不能皆雨澤而無亢旱也而農田之堰務以興自農田之不能盡低窳而無高阜也而水利之裨益乃大青邑介於嘉眉地力瘠薄田之望水猶農之望歲焉初唐張武始

於邑北興修鴻化堰沿江開溝引河水灌溉直長四十里大明余承勛相繼補修民歲獲利至於我

朝日久淤塞乾隆十九年邑令林鴻奉 制軍黃檄興水利遂議復修統計用水田畝分上中下三等派費又於邑南蓮花壩議修普興堰亦計田派費通詳修築經營八載慘淡匠心緣二堰身太高堰頭不得地利農民苦之歲癸未余相度地利籲稟 制憲檄委本州任牧率同確勘改修二堰堰頭淘挖堰溝以寬深爲度堅砌魚嘴攔水入堰鴻化堰計灌田七千六百四十畝普興堰計灌田六千畝二堰堰水乃暢流焉

夫深掏灘低鑿堰修堰之大經也因地利而變通之庶幾亢旱無虞水利普遍乎

補修城垣記

王承熾

城垣之設所以保障一方扞衛四隅也而啟閉以時防閑有候體制於是平肅青邑水陸通衝界連眉州樂山仁壽井研夾江五州縣明天順間邑令任廣鄭瓚相繼築土城嘉靖初邑令楊麟易之以石週圍城牆共計七百八十三丈積四里三分高一丈二尺底寬一丈四尺頂寬九尺向有五門城牆日久坍塌城樓頽毀無存城洞崩壞共坍城牆二百四十丈

惟小南門洞未損北門內外捲洞暨東南西三門外洞俱頹
癸未仲春余倡捐俸廉勸諭紳士客民量力捐輸共計銀二
千餘兩鳩工補修四門內外門洞重建四門城樓增建四門
卡房擇紳士董其事自癸未仲秋興工至甲申季夏工竣嗟
乎補偏救弊邑令之責也尚義急公臣民之分也余不敏未
能舉一邑之民而盡教養之舉也聊盡職守而已

修城董事 王一柱 孫成璽 何坦 王殿一
馬龍 雲天章 蘭五桂 沈良棟 余修儒
重修養濟院記 王承熾

聖天子以仁育萬物蠲租設賑歲凡幾見其所以養老恤幼者已
無所不至矣熾既治青之明年見夫通邑士民家無餘積戶
鮮蓋藏思所以安老懷少者有志未逮而窮民無告間或有
人求所謂養濟院基址已無存焉爰捐廉俸購買木石灰瓦
於城東門外數武建立正房五間傍房四間門樓一間圍以
土垣覆以瓦片床棹鍋碗俱求全備設看司一名月給工食
以司啟閉收縣民之顛連無依者入院撫恤於縣城內查出
官基二處白菓渡查出官基一處招民豎屋量收地租以充
口糧夫一夫不獲曰予辜古人之毅然以天下爲己任者載

在典藉班班可考余既有父母斯民之責亦何忍不推廣

皇仁哉

修鑿松栢灘上水漕記

王承燧

松栢灘在青衣江上俗名啞漣灘蓋川灘之小者而其名特著豈非以其險哉其險爲何大石鵠立水急浪湧是以灘之險也巨石爲底橫鋪順列下水漕石沉水深水勢迅駛寬廣十數丈勢如奔馬響若雷鳴每歲春冬不涸天設之險人工難施上水漕橫寬四丈巉巖石塊犬牙交錯綿延數十丈夏秋水漲丈餘舟行無碍每遇春冬江水涸時行舟逆流而上

青神縣志

卷四十八記

十五

必由石縫牽拉一有不謹多至磕損舟人苦之癸未季秋制軍阿以川灘之險上關國帑下病商民檄飭沿江州縣倡勸捐修余奉文之後諮訪諳練舟師捐俸雇匠修理上水漕石塊計直長四十六丈橫寬二丈八尺深四尺向之險者去其太甚舟楫往來庶幾可無慮焉或曰是灘也天設之以彰善癉惡也修之毋乃過計余曰某誠不敢以人力挽天心亦求盡吾心而已

後遊中巖記

顧汝修

乙丑孟夏佛生日携兒子枏及同行三五輩遊中巖盖億甲

戊三日至此爲重遊辛酉十月至此爲後遊中巖之遊並此爲三矣其初遊也泊舟橋下適見兩巖之中澗水注江所石爲以跨之上也登岸過橋循澗東而上修篁茂樹濃蔭交加人行其中如仰屋宇數武之內已有世外意矣半里許過石橋西見巖端喚魚池三大字相傳東坡拍手喚魚處其下卽池石封苔蘚絕往路不可到仰瞻峭壁上有中巖二字與造物游四字大可如斗字體不一而各遒勁皆名賢手跡也再上爲羅漢洞爲牛頭洞爲大佛巖爲太極泉相去各一里或半里泉下有流杯池羅漢堂者於懸岩下塑羅漢若干坐其

內非有棟宇也大佛巖亦如之因邈迤上下又度石橋而東一石突路隅下有穴崖嶙峋若伏虎狀其上磨爲方橫直大小不類皆前代題咏各體詩率漉漫不可讀自喚魚池以來凡古蹟不可勝紀大率宋元以下居多至此則一徑傍溪歷石級而上入天王殿再登數十級爲佛殿所謂中寺也天王殿前後各有路轉而東北石筍插天作鼎足勢梵宇冠其上爲上寺仰之如在天際人間無是也旣入上寺門循石磴升乃兩筍對開儼削成者其間題咏益夥中間宛如巷寬可兩三步上可二十步許化工之竒嘆不絕口比盡則抵寺一徑

卽從第三筍鑿磴以達急摳衣登之而身在上寺矣寺之上仍有一層然後及巔路逼仄憊不能上寺前隙地一方面各二丈許卽筍之一頂也寺僧云江干至此實五里然自初過石橋悉行綠陰中虧蔽天日者十之六七東西各傍澗下視亦不見底但聞澗水潺潺而已比立筍上觀之巖壑全局隱現目際蒼藤古木五色紛披蓋霜染木葉而時猶未脫爲錦帳爲繡屏難以舉似其左則斗壁千仞檜栢如薺中時露石骨枝上無風而搖恍惚若有上下者詢之寺僧皆猿也因知樹杪之外人墾石罅地羣猿竊取地中物逐之奔叢薄云及

再遊則向者猿奔之樹已屬烏有且聞巖際丁丁聲余詰兩沙彌何爲者答云取材爲修補計耳余曰其然耶且修補功德小伐樹罪孽大歷千百年以有此樹一旦而伐之雖有力者宜不忍况爾曹耶然此猶未大傷也今茲之來橋邊竟無泊舟處遊人之踪絕矣比至太極泉左右天宇昭曠叱耕者可睹回憶辛酉冬渺如隔世卽十年前景象亦不可復識余止步怒然從者曰耕顧不利耶余曰匪耕之病耕而可睹之病也脫巖端古木猶存雖百耕者聞聲而不相見其境詎不似仙而濯濯如此是曩者伐樹之故智浸淫以及於此也過

此以往安所紀極耶夫鬱紆蒼秀之致四顧冷然未及登山已覺靈氣勃勃卽安知不蒸爲雲雨毓爲俊傑以大有造於斯土是真山水精英飛沉結聚以俟有目者聘望愜心不幸暴露補救無策未可一一爲俗世人言也嗟乎海內所稱佳山水閱歷不爲不多矣大都天工人事交濟其勝或天工十之一而人事十之九者比比也又真賞者少僻在幽遐屐齒罕到以故大江南北嘖嘖人口者率爾通都傍大邑一邱一壑增以絢飾輒杖策者接足挂席者啣尾焉吾蜀名山如三峩青城登降無慮旬日卽鮮命駕者此巖幸在江干縈紆曲

折舉趾不勞夾以崇山疏以深溪禽魚草木自有天地固宜延攬之士往來無虛日而寂寞相尋迄於不能自保其勝疇昔之遊賞歌咏者伊何爲哉何古今人不相及也顧從者猶曰某處置一亭某處磴一臺某處繞以遊廊臨以傑閣稍參金碧庶睹輝煌余聞而笑之人之遊山水者賞山水耶賞金碧耶然此固遊客之常談無足怪也余前兩度之遊亦嘗以爲上下寺暨流杯池等處宜稍經營俾各整潔旋苦其難則又以爲但得數十人之力剪榛蕪掃落葉使泉石齒齒溪水溶溶松根竹節楚楚在人目當復易易而以今所見尺寸之

益弗可冀矣戕之者且不啻尋杖欲僅完其當日之舊而亦
岌岌乎其未可恃也可勝懼哉可勝嘆哉因記前後不同之
概與區區所懷之私以告今之守斯土而有心於山靈者
重修鴻化堰記
顏 謹

夏王盡力溝洫周官務詳畝遂蓋王政莫先於養民而養民
首重乎水利水利之興當官者不得辭其責也夫天下之勢
東南水高於田故築堤以取水西北田高於水須作堰以灌
田余於嘉慶八年來蒞斯土竊見青邑遶城四面盡屬膏腴
大江洋洋卽在其東而每值春耕往往輟耒懸耜殊深扼腕

謂其無堰乎詢之士民乃知非無堰也有堰而壅淤未修也
非未修也堰頭不得地利故於唐修之於明修之於我

朝又屢修之不免於壅淤也爰稟州牧率邑紳耆相度形勢於
舊堰頭上十里買眉州地作堰頭並截周河侯河二水灑迤
而下引入舊溝而水遂暢流焉是役也一切費石工竹工土
工計以萬餘邑中父老有銳志興修者亦有疑功程浩大難
以收効者余極力勸勉互相踴躍事始於嘉慶十年工完於
嘉慶十三年凡四載而大功告竣民始資其利矣按是堰灌
田一萬四千餘畝約費二萬餘金堰成之後計其所獲不下

百倍千倍焉水利之大固如是歟仰思興修之日有董事者有墊本包修者有經費督功者無不竭盡心力今而後乃由苦而得甘矣多利而少害矣於以見天下無不可爲之事亦賴人之同心共計耳余敢以爲功哉

序

明

遊峩眉集序

余承勛

蜀名山岷峨最著岷嶓則禹貢有之峨連蔡蒙乘載所不及故無主名目夫有圖志也峩眉與青城鶴鳴諸桀嶂始昭載

青神縣志

卷四十八序

二十

籍而秩次之固五嶽之遺也然靈峻險僻游歌寡儔作賦如揚雄太冲景純諸子但稱之曰絕限曰重阻曰爲泉陽之揭寥寥此數語焉爾其他多望吟寄咏實未之窮探周覽盡峨之中所有而取之故知峩者鮮矣乃憲察春山富公以所著遊峩圖記與夫詩若干首授余讀之盖守古渝時所作也三復嘆曰古者因地括象故坐覽要害限定策畫者尚夫圖山□異制故序名物述理蘊以翼乎方志之編次焉尚夫記辨水土齊聲音各因其性參夫化理而流通之風俗所由正矣尚夫詩是故春山茲遊盡取夫峩所有而圖志聲歌之三尚

之美備矣自後擢憲察按沈黎脩豫陳紀遠人懷綏乃慨夫
邛崃險阻犯瘴務而走集者疲且病久矣乃審雜候程險夷
議遠邇自越嚮求西南夷別蹊闢而治之分堠列戍捷孔道
數百里以達於峩眉之麓其民歌誦之蓋先圖定畫化理旁
行採風於衢路者皆於是乎三尚得之謂非籌邊之助也邪
是以引峩集

銘

宋

史子深墓誌銘

唐 庚

青神縣志

卷四十八 銘

十一

君諱通字子深姓史氏世爲眉之青神縣人少與其兄恂皆
以文學知名於鄉年十七以貢舉不中遂退居於楠溪之上
杜門著書絕人事者數年得易著若干卷乾坤別解三卷禮
記義一卷詳說四卷律呂氣數十二卷書義八卷詩義若干
卷論語孟子解各若干卷子史論若干卷其書既出學者翕
然稱之或曰是知古矣其於時事未必知也已而君至京師
進世要機務十卷芻蕘策十二卷其言當世便利非草茅布衣
之士所能言之至於論兵則雖謀臣宿將練習邊事者弗能
易也或曰是能言矣其於行事未必能也已而君起家尉通

州遂能使人畏己遇事輒斷號爲強明至作盤石令則又專務寬厚和易撫字勸課如古循史所爲蓋二邑之俗不同故君所以應之者亦異名聲大著諸公文章薦之而君已卒縣人哭泣悲思至今父老猶喜道當時事吾嘗謂學者所貴乎知經者以其能知道所貴乎知道者以其能應物白首窮經而不能應物又何以經爲哉悲夫君學足以知經道以足應世而晚得一命年止五十七不得以充其志官止於一縣令不得以盡其才故其應物者止於如此此吾黨之士所以嗟惋嘆息爲之請銘以葬而吾亦不得而辭也史氏系出魯國後

徙杜陵唐末入蜀遂家於眉曾祖考皆不仕君中元祐三年進士第歷達州通州尉資州盤石令年月日卒於官舍先娶侯氏再娶程氏男二人曰紀曰彥時女五人長適某次適某孫男二人女一人皆幼以大觀三年三月日葬於某山之原銘曰

子深之書學者多有雖不銘之自足以久旣足以久而又銘之子深之傳愈久不疑

亡妻王氏墓誌銘

蘇軾

治平二年五月丁亥趙郡蘇軾之妻王氏卒於京師六月甲

午殯於京城之西其明年六月壬午葬於眉之東北彭山縣安鎮鄉可龍里先君先夫人墓之西北八步軾銘其墓曰君諱弗眉之青神人鄉貢進士方之女生十有六年而歸於軾有子邁君之未嫁事父母既嫁事吾先君先夫人皆以謹肅聞其始未嘗自言知書也見軾讀書則終日不去亦不知其能通也其後軾有所忘君輒能記之問其他書則皆畧知之由是始知其敏而靜也從軾官於鳳翔軾有所爲於外君未嘗不問知其詳曰子去親遠不可以不慎日以先君之所以戒軾者相語也軾與客言於外君立屏間聽之退必反覆其

言曰某人也言輒持兩端惟子意之所嚮子何用與是人言有來求與軾親厚甚者君曰恐不能久其與人銳某去人必速已而果然將死之歲其言多可聽類有識者其死也盖年二十有七而已始死先君命軾曰婦從汝於艱難不可忘也他日汝必葬諸其始之側未期年而先君沒軾謹以遺命葬之銘曰君得從先君夫人於九原余不能嗚呼哀哉余永無所依怙君雖沒其有與爲婦何傷乎嗚呼哀哉

明

張太夫人合葬於公祥墓銘

萬安

吾州形勝岷峩間鍾靈毓秀多英賢由漢而宋千餘年鉅家
大族相蟬連逮公蚤著祖逖鞭馳逐天衢奮孤騫民曹事業
疇與肩位不滿德俄屯遘夫人扶襯逕西族送終大禮能周
全矢心守節老愈堅余門不墜功歸焉育成雛鳳午雲邊勲
名耿耿揚八埏重封累贈誥花鮮公家袍笏兒孫傳公家門
第時方闡公家封墓舊牛眠今茲合壁恤恩偏虹光萬丈燭
長泉峩峩穹碑神道前昭示來裔俾勿諼

中巖山碑記

竊觀中巖山者考圖記中一名慈姥岩舊名玉泉岩乃慈姥

青神縣志

卷四十八記

二十四

夫人顯迹之地也其山趾距青神縣二十里其周環則層巒
而招提崦然距兩山之下左右皆合清泉潺湲岩谷嶽嶽懸
岩疊石其上則佛龕妙則松盖清有玉泉怪有石笋感應則
有羅漢洞瓌琦則有金剛臺至於變不知則有神燈夜明圓
光晝見神鐘或鳴異僧出沒自晉至宋慈姥夫人生八子皆
菩薩龍寶彼所擇此山故施尊者以充阿練岩處卽尊者顯
迹盤旋之所也按經云世尊已受波旬請諸羅漢箇二先取
入滅時阿泥樓逗尊者卽白佛言諸聖弟子先取入滅當來
誰爲人天作福田耶於是世尊勅大弟子十六人取籌住受

人天國土一十六處既分住已惟諾距羅尊者分住南瞻部州卽此是也又按牛頭寺記云宋元徽二年秋七月涪江漲湧一佛出五色光隨流至岸下牛頭僧虔禱迎至峯頂建堂以安之既二年有病疥僧披破衲而遍體瘡痍且告投宿主僧憐而欸待甚厚臨別遺一鑰匙謂僧曰他日厄會願訪我於眉州青神縣慈姥後岩前有一大石號曰石笋敲之當得際會庶免此厄耳言訖乃去明年有貧子盜佛頂之珠愈扳愈高乃曰諸佛具大慈悲皮肉骨髓常施故像俛首俾取之而下龍潭洗恍然失之翌日主僧被官吏所逼必欲索珠因

思徃日病僧之語徑至眉州青神縣徧循後岩果見石笋敲之遂分爲三有童出應曰豈牛頭寺主乎對曰然爲大佛額珠特來相告於是俾瞑目凌虛而遊片時開目卽在龍宮矣王拜眾聖且怪凡氣襲人僧語其故王曰聖佛額珠海神獲之矣齋畢當來施寺主得珠置於鉢內僧曰無循舊路吾有捷徑旣入石洞如行暗室中須臾忽聞呼其名者開目視之則明白四達已在牛峯之下矣遂歸寺還珠佛額因免此難偈曰額上明珠已露機那堪聖佛放頭低洞門不是無人鎖者鎖還須者鑰匙以此言之尊者出世顯世接物利生遺人

祿嗣凡所禱者若合符節自晉宋迄今多歷年矣續有大善知識慧日能禪師祖覺別峯繼往說法實希有之招提也又諸貴官賢儒題名讚詠詩草莫能備舉今大明皇朝自太祖洪武混一九州天下一統四海昇平遠夷入貢而此寶坊之興又勝其前矣正統八年歲在癸亥三月朔三日住持大洪圓明圓睿圓鏡等重修大雄寶殿天順間又得大善知識可證徒悟果等完修兩廊天王等殿金裝神像四眾瞻禮得未曾有宏治間證之徒姪悟叶同合山僧眾增修法堂塑裝佛像贖請四經今可證之孫舟順乃是滿江名家之子隨

青神縣志

卷四十八記

二十六

師修造成化二十二年輪財請給度牒宏治十五年頒院焚獻起難遭想發無上心誘化本縣歸德鄉耆老劉坤男通厚等喜捨資糧命工鑱石取石海浸法堂周圍琢平如掌磨瑩琉璃亦如安養勝都率陀天界今已克成阡文以記之予非敢自執己見遂採摘圖中尊者出世顯迹事實中巖歷代原由紀錄以爲後日之記云

時

宏治十七年甲子正月上元吉旦中巖退隱野衲圓睿八旬有

二纂集書丹

重修青江書院記

朱調元

書院之設卽三代黨庠術序之義尚書大傳云大夫七十而致仕老其鄉里大夫爲父師士爲少師歲事已畢令餘子皆入學此書院所由昉歟唐元和中李寬建石鼓書院宋初賜以額此書院得名之始南唐昇元中白鹿洞建學館以李道善爲洞主掌其教授嗣後胡安定朱紫陽繼起著錄弟子數千計則書院之極盛也我

朝文教覃敷英賢接踵日月所照咸知文字蜀省書院卽文翁石室故基各府州縣亦均設書院青邑乾隆初邑林公始爲

青神縣志

卷四十八 記

二十七

創建五十年馮公廷鋆遷建今所日久漸就傾圯前令廖君畧爲補葺改向南街予承乏茲土見其屋宇卑陋不足容多士且門臨街衢市人雜沓尤非肄習之所宜欲改修之而未逮也今幸有捐項亟屬齋長命匠鳩工改復舊向其後繚以牆垣添建外堂五間頭門三間凡材木之朽蠹者易之靡宇之狹隘者濶之只期堅久不務華侈工旣竣予閱之而不覺重有感也青邑山明水麗代有聞人如宋之杜殿院陳太常楊公父子明之余公祖孫事業文章彪炳史冊至

國朝百餘年來科第寥寥無能繼起豈化導之無方與抑游息

之無地與今書院畧加寬綽諸生藏修於斯息游於斯庶英材崛起媲美前人以仰副

聖天子作人之雅化此則予之所厚望也是爲序

特授四川直隸眉州青神縣知縣加三級紀錄五次江右新建朱調元撰

九仙衣披一品之概可謂名下無虛嘻有嗣如此 封翁

足以傳也敢以不文辭耶翁諱元燿字月亭先人由浙宦蜀以失機死事子孫避難峩眉至 國初諱 聯第公始遷斯邑

代不乏人遂爲青神邵氏本生父諱 拔爲邑名宿生三子翁

其季也十歲撫承胞叔諱 樟桃稟異姿能文章試輒高等十

六入成均屢舉不第二親相繼卽世盡禮盡哀鬻產營塋族人以其過繼也每凌藉之翁有求輒與致家道中落遂棄儒爲賈徃返滇黔數次因疎財故益不支忿然曰貧富命也吾人心存濟物安在寒士必不可種德耶於是設帳授徒願學

奉政大夫明府邵棠溥先生行述

兩江總督 李宗羲

公諱希奭字次周號棠溥四川青神縣人父諱元燿太學生
隱居教授好義急公行誼重一時公生而歧嶷英達過人九
歲能文章好讀經世書十五補上舍生弱冠中道光壬辰
恩科副車時老師宿儒皆謂掇巍科如拾芥乃文益工數益奇
又十年癸卯始戰勝於鄉闈與羲同出曾文正公門下一見
如舊相識遂約公車偕北夜同宿晝同行抵京同齋會文同

青神縣志

卷四十八記

三十

較他莫逆友更若飲公瑾醕醪咏叔度風月也且其容貌方
嚴衷懷虛抑學問淹雅議論閎通無賢否智愚莫不見而生敬
而文稿一脫尤匪夷所思如長江大河一瀉有千里勢諸同

人不敢望肩背也豈知文章憎命造物忌才五上春官三薦
不售又不屑投刺公卿之府曳裾權貴之門以自屈其磊磊落
落之概其間資罄而歸歸而復往前後駐京近十年因代方
伯謝忠愍公籌畫疏運爲楚帥楊公所識擬保知縣辟襄戎
行囑忠愍致意公以親老力辭竟就教職歸養楊公知其志
不可奪亦弗相強也回藉數年選授金堂訓導適滇匪竄蜀

以辦團禦賊功保陞州判 賞給六品藍翎時羲隨師相
營文正每爲言及轍惜其大才小用屢囑函致出山乃文正
之望彌切而公之心益堅嗣聞公奉 父諱旋里文正知其
大事已畢無復顧瞻移文資調公果於服闋後翻然思改鼓
棹南來廿年濶別一朝聚首髭髮雖班精神如舊以羲之微
勞而膺重祿視公之竒才而屈下僚覺昔者嘗以不見爲恨
今者又以得見爲慚也維時髮逆久破悍卒驕兵佈滿皖蘇
官民交慮文正檄公資送恩威並用剛柔合宜辦理十餘月
遣散數萬人使長江肅清流民安集公之造福豈有既耶戊

辰冬文正奉

調回 朝羲亦受

命撫晉公復從山

東軍勦平北捻李爵帥上公功得

旨送部引 見以知

縣籤發湖北到省半月卽總辦當遠二縣牙釐公接事後訪
求利弊先裁陋規商賈額祝有逾父母公餘又設帳爲諸生
講學於是負笈來溶者權關左右幾不能容及門求刻文稿
公以爲有文不如行古來膾炙人口者何啻汗牛充棟區
區識字烏足以傳其有才不伐類如此及試用年滿當道以
老成持重清謹廉能入 告請以繁缺補用壬申孟冬方詳
補當陽知縣而公已於月之十八日卒於河溶差次年六十

三方公之任金堂也適同治改元 覃恩以六品銜教職

請 勅除例 封父母外業將本身應得之儒林郎

貶贈祖父母越數年乃以次君子安之詹事府主簿加級獲

封奉政大夫今年春羲起復入 覲在道接督兩江

旨暫駐楚北疏辭適三君子方扶柩回籍弔唁之餘不勝悼惜

又弗忍公之懿行沒而不傳也爰濡墨而次其大都如此

創建義學碑文

劉伯蘊

蓋聞有人心然後有風俗自來風頹俗壞非其人心之薄亦
所以陶成之者無其具也余山左寒儒竊慕文學於丁亥冬

青神縣志

卷四十八記

三十二

初蒞青邑採風之餘覽其山川形勝見夫錦蒙二江虹貫東
北嵎嶺三峯翠峙西南固知秀氣所鍾必有人文蔚起及考
厥邑乘而鄉學有缺心竊惜焉誠恐以文秀之區學校不廣
人心漓而風俗就敝也爰集縣中矜耆議設鄉學之舉惟懼
土地瘠狹民力維艱經費無所出竊喜士民好義不數月間
踴躍輸貲者計式千餘金因置買學田酌立義館七所延請
品學端方之儒集寒家子弟教以詩書訓以禮讓從茲薰陶
有方邑之中多一敦信禮教之民卽少一邪僻梗化之民况
相觀而化家誦戶絃擢巍科登黃甲者又相繼而起耶是則

鄉塾之設作人心而實以培風俗也其宰斯土者之厚期也夫是爲序

遭賊後縣中建醮募化簿序

原夫戴天履地庶民叨雨露之恩食德飲和萬彙荷生成之澤 皇仁有象疵癘不生 聖德無私修和長享青邑翠接峩峩峯秀連錦水久託昇平之福素稱完善之區乃自李逆竄擾蜀中盤踞縣境蹂躪我疆土塗毒我人民二百餘年之生聚盡被傷殘六七十里之偏隅半成灰燼又况大兵齊集疆場變作戰場萬壘長圍山谷多成鬼谷一年頓易諸劫

齊來或病染瘟瘧或屍填溝壑或親冒矢石而爲 國捐軀或拋棄妻孥而被脅殞命死者無所依歸生者極其困憊罪既獲於彼蒼殃遂遺於遍野嗟乎讀弔古戰場之文知九原冥魂不靖效鄉讎朝服之禮覺一誠感格非虛我 縣主王公痼瘵在抱休戚相關城中景况淒涼心存變理境內人煙寥落念切撫綏爰集紳耆議清妖孽建 羅天大醮仗法力以驅邪藉優孟竒觀將和聲以鳴盛凡我四鄉人士共攄一念眞誠不惜囊金同瞻寶座洗心革面潛消已往之愆迪吉迎祥同享將來之福行見有幹有年災殃盡掃從茲以似以

續康阜咸歌

奉 詔修理余肅敏公塋域記

賜進士第巡按四川監察御史前翰林院庶吉士交河王珩撰

西蜀余肅敏公實我 國朝名臣也勲業樹於當時隆名溢

於身後海內清議迄今未泯考諸典記誌銘可知矣其大且

顯者則總邊務握重兵恒爲國家萬世之計當時北虜至相

戒不敢犯故卒之日 輟朝遣葬而贈謚之典尤備噫柳莊

疾棘衛君當祭而輟禮晏嬰既往齊君趨車而行哭公之始

終恩遇可謂並軌於前矣且其子若孫俱以科第相繼爲翰

青神縣志

卷四十八記

卅四

林臺憲參戎哀然有祖父之風噫伊陟象賢丁公世美公之
奕世相承可謂克昌厥後矣迺今嘉靖己亥

聖天子詔下凡一品大臣墳墓圯壞者許有司修理之命近民一
人長給灑掃並蠲塋域所占田畝斯優恤名臣盛典矣於時
分巡富子好禮分守孫子應奎迺以其事上於撫按而巡撫
李公心齋巡按董公嘉嶺俱樂從之謂此舉上以奉

天子之休光下以光大臣之令德似不容於緩者乃命有司繕修
祠宇蠲除塋糧畝四石五斗仍置守冢一人昭罷命也噫公
之勲業在朝廷經濟在邊徼文章在典紀可謂盛矣褒崇於

生贈謚於沒追恤於五十年之後可謂光矣且英葉武襲後
先相望可謂悠矣盛而光光而悠遠噫其不朽矣予以庚子
春來巡茲土至辛丑夏聞公之瑩域之修工已落成仰

聖天子之禮重大臣恩賁泉壤又仰公之功業光盛垂諸不朽故
樂書此以記其美云

續劉公伯蘊德政坊序

張序

從來守令爲 朝廷所重黎庶隆父母之稱官之賢民之福
也且自漢至今歷年三千有奇而傳記所載循吏不過有人
卽我青邑設立縣治前後捧檄蒞臨者亦非乏精明強幹才

青神縣志

卷四十八記

卅五

堪任事之官而求上克副朝廷之重下無慚父母之稱者則
劉石玉公爲首公名伯蘊山東濰縣世族也由丙子科舉人
充方畧館謄錄選授青神下車未久百度釐整盜源清而善
良安業陋規減而吏胥畏威尚僕實黜囂凌崇本抑末禁止
令行民俗爲之一變因而慨士氣之不振也爰集紳耆相度
地勢開立黌門建設議學則養興而教亦立焉且其本實心
以行實政積數十年如一日是以民歌其德而士咏其化近
沐其澤而遠慕其風卒致名重上游委署眉篆留任青神公
一身往來兩地回青則州民興借寇之思到眉則邑民起歌

廉之頌嗣調萬縣攀留不獲夾道相送者扶老携幼如人子
之不忍離其父母焉古人云得能吏不如得良吏昔聞其語
今親見其人矣茲閣邑同建德政坊二座以表去思商之於
余余不敢以不文辭走筆記此實不能狀其萬一特以表其
大畧云爾

張公德政坊序

公諱尙浴號鐵華山西陽曲人也肇堯帝之名區風敦勤儉
鍾冀州之淑氣品萃精英簪纓世第累代榮列詞林閥閱家
聲一門顯登仕籍明德之後皆達人博物之賢真眾母本純

儒而作吏發軔青神殫善教以保民誠推赤子崇文重道俗敦
勸農採風則卑躬下士溫語如春聽訟則酌理準情澄心似
水舉二百年未興之典闡幽則節孝揚徽糶七千石常貯之
倉減價則貧窮沾惠練團兵以預武備勇奮鷹揚弭盜賊而
殲渠魁威除馬害化莠爲良勝東平之樂善矜孤恤老類西
伯之施仁民貧地瘠追呼免而嗷息鴻哀政簡刑清賞罰明
而爭消雀角衡文則金針暗度弼教則木鐸齊宣考書上上
迥非百里之才德著謙謙常懷四知之戒由是夜月仙池不
聞犬吠清風古閣共見魚懸陽春有脚旋開滿縣之花洞鑒

無塵朗照虛堂之鏡幸遇慈君咸沾膏雨凡爲黎庶莫報涓埃聽載道之口碑願乞寇君久住沐流芳之手澤同欣張永重來此地坊表鴻猷永頌郇公之黍他年像圖麟閣長思召伯之棠

觀風文

青神令

左元烺

照得化民成俗端由學校之振興返樸還淳胥賴士林之表率十室必有忠信况屬雷封六經發爲文章全憑月旦惟茲青邑分野參躔據蜀郡之東南挺山川之秀麗文峯鼎峙標石笋於靈嵒寶鏡圓光繪霜菱於秋水聞三山之牧笛犢過

青神縣志

卷四十八記

三十七

難尋漩五渡之橫舟虎撐恍見風清古閣月朗仙池鷓泛江頭夾岸之芙蓉似錦麟遊井面連阡之禾黍皆豐惟清淑之所鍾故人文之傑出夷考當年余肅敏總制三邊永垂駿烈王子思精通萬卷共仰鴻才陳太常嫉惡如仇楊大理愛民如子清操骨鯁杜翰苑聲震朝端治本心誠楊少保望隆海內緬風徽於昔日不乏名賢想競爽於今茲應多碩彥本縣名彰冀北族著江南溯忠毅之源流葉傳八世衍詩書之基業花夢雙枝一行作吏慙美錦之初裁三折知醫欣竒文之共賞勿矜險怪勿恃浮夸語絕雷同毋落前人之窠臼理宜雪

亮盡歸巧匠之鑪錘使成竹之在胸必生花而應手法密則
穠纖合度氣盛則高下咸宜盡一日之光陰筆宜鳴鳳吐寸
心之滂沛珠必探驪棘院風清爰集生童而共試蘭臺晝永
惟秉公正以持衡果白璧之無瑕自青錢之入選期定孟秋
之朔風甫無愆惠邀雋品之臨衣冠必整看此日青江士集
各抒錦繡之詞卜他年白塔燈明預叶狀元之兆遐心莫賦
早開徑以相迎望眼偏勞實臨風而竚俟

續刻成化御製祭文

成化十七年歲次辛丑二月朔六日遣四川等處承宣布政使司右布政使黃紱諭祭於太子少保兵部尚書余子俊妻夫人魏氏曰爾以柔善之姿克惇婦道相夫蒞官薦躋顯位累頒褒命用增爾榮宜享壽年以享遐福胡嬰一疾遽爾云亡爰循卹典以示寵恩特命有司爲營葬祭爾靈不昧尚克歆承尚饗

成化十九年遣禮部侍郎倪岳諭祭於太子少保兵部尚書曰公之云沒奄及首七追念賢勞益增嗟悼特茲遣祭公其

青神縣志

卷四十八 宸翰

三十九

享之

七至四七皆同此祭文諭祭

至五七遣禮部侍郎張悅至七七均此

諭祭至塋又遣四川承宣等處布政使右參議高綸祭文云公之云沒奄及窀穸追念賢勞益增嗟悼於茲遣祭公其享之

成化十九年三月十三日勅總督軍務兼督糧儲太子少保戶部尚書兼都察院副都御史余子俊曰朕惟宣府大同偏頭關北鄙一帶京師藩籬也前此守臣率曠官隳事致邊人荼毒於醜類者歲歲有之朕爲此慮命卿經畧之卿至彼凡武備果能事事多方修理非直墩臺然也糧儲先期飛章督

運非直本處然也初志甚可嘉悅念往來千餘里勞苦殊甚
茲特遣人以羊二隻酒二十瓶往勞卿其益盡厥心殫厥謀
務成厥終夫能成終卽能成功而戰守有足恃醜類不敢近
邊疆以奠兵民用寧不惟不負朕委託之重而卿籌邊之譽
亦有辭於永世矣欽哉無替朕命

成化二十年七月初八日奉天承運皇帝制曰我國家式稽
古典優禮大臣生必隆其祿位沒必加諸贈謚者所以崇德
報功獎勵賢勞也故太子太保兵部尚書余子俊以通敏之
資宏博之才蚤擢賢科著名部屬出守郡而進方伯政績彰

聞副都憲而長內臺邊功昭著載陞司馬而轉司徒益竭勤
而殫忠蓋加宮保之異秩督京營之戎機顧茲委任之隆胡
遽嬰疾而逝進念徃勛卹典宜伸茲特贈卿特進光祿大夫
太保謚肅敏於乎建功樹績生已脩歷於顯榮稽行易名沒
可垂光於來世尙膺休命用慰冥靈

弘治十六年歲次癸亥七月十八日皇帝遣四川布政司右
參議郭祥鵬諭祭於錦衣衛指揮僉事余寘妻恭人張氏曰
惟爾性資柔淑禮度端莊作配名門克修婦職有夫旣貴爲
國近臣爰錫褒封用光令德方治榮祿遽爾淪亡特示殊恩

遺官諭祭爾靈不昧庶克歆承

弘治 年 月 日遣禮部尙書耿裕諭祭於太子太保

兵部尙書余子俊曰卿以博學發身賢科擢屬地官才猷茂著既進郎於粉署遂出守於名邦遷方伯而楊旬宣之聲晉都憲而建巡撫之績司徒司馬迭轉厥官足食足兵克効其職功業著邊城之築德望稱宮保之陞委用之方隆胡嬰疾而長逝老成凋謝悼傷朕懷茲特贈太保謚肅敏錫以塋祭卿其尙享

傳

青神縣志

卷四十八 宸翰

四十一

宋

陳希亮傳

宋 史

陳希亮字公弼其先京兆人徙青神又遷洛陽希亮幼孤好學其兄使治錢息悉焚其券業成諭兄子庸使學俱登天聖進士調大理評事知長沙縣有僧海印出入章獻后家交通諸貴倚勢據民產莫敢發希亮捕寘諸法一縣大聳又辦郴州竹場僞券給輸戶送官事覺當坐察非所造出之已而果得僞印賜五品服遷殿中丞徙知鄆縣俗多火災巫覡歲漁民財託言緋衣二老人行火希亮爲嚴禁之勒爲農者七十

餘家毀淫祠數百區遷大常博士去之日父老泣送以母老乞侍親復知臨津服終改開封司祿福勝塔火詔有司更造希亮上言願以此費餽陝西用兵又言青州民趙禹奏元昊必反可賞不可罪人諱其言擢徐州推官坐外戚沈元吉誣訴引罪廢居踰年盜起京西殺守令富弼薦知房州房素無兵備希亮取牢城卒雜山河戶得數百人日夜部勒民恃以安有殿直雷甲不能戢下所至爲暴當行軍法願捕盜自贖獨治其爲暴者運使遣供奉官崔德贊捕劇盜黨軍子不能得妄殺竹山民向姓父子三人冒充之察其冤抵罪流德贊通

州人告華陰人張元走夏國爲謀臣詔徙合族於房饑寒且死希亮察其疎屬奏釋之老幼走哭畫像祠焉移宿州作飛橋以便往來賜縑褒獎始下其法自畿邑至泗州皆效之皇祐元年入奏事仁宗忽憶昔沈氏事勞曰知卿疾惡已甚改提舉河北便糴轉運魏瓘劾其擅增物價廷辦直之奪瓘職希亮力請罷提舉還知滑州會河溢悉發禁兵捍掃廬所當決處水不爲害盜起冤句劫張郭鎮執通判井湍改希亮知曹州不逾月悉擒其黨方淮南饑運使亟調里胥折役米十三萬石米驟貴希亮請悉蠲之旁郡皆得除豁壽春守王正民

坐劾爲白其無罪正民得復官久之徙知廬州虎翼軍謀反
伏誅餘遷者疑不自安竊入府舍將爲不利希亮貸而流之
盡以其眾給使令守倉庫眾感德誓爲効死改提點江東刑
獄遷度支郎中徙河北嘉祐二年入爲開封判官判三司戶
部奏蠲滎州鬻鹽三十餘萬斤歲久殫竭民破屋籍沒三百
餘家盡還之俄兼開折司日夜課吏自天禧以來末帳六百
有四明道以來生事二百一十二萬得免稽留會接伴契丹
使還請外除京西轉運使賜三品服石塘河役兵叛其首周
元自稱大王震動汝洛希亮卽日輕騎出按斬元以徇流軍

校數人餘悉赴役如初轉遷京東捕大猾號截道虎者流諸
海島徐州守苛暴以細過籍民產誣小盜抵死希亮劾廢之
移知鳳翔歲饑請以陳易新官民皆便於闡使者入朝預戒
譯者宴勞如禮至日羅拜庭下食畢護出其境無一人譁者
英宗卽位遷太常少卿自劾求去分司西京致仕卒年六十
四贈工部侍郎爲人清勁寡欲不假人以色自王公貴人皆
嚴憚之見義勇發不計禍福所至奸民猾吏易心改行不改
者必誅然出於仁恕故嚴而不殘少與蜀人宋輔游卒後養
其母終身以女妻若子端平使同諸子學後登進士子悅度

支郎中恪滑州推官恂太理寺丞慥見逸民

陳慥字季常希亮之子少與蘇軾遊論用兵及古成敗自謂一時豪士稍壯折節讀書晚遊於光黃間曰岐亭庵居常蔬食徒步往來山中妻子奴婢皆有自得之意不與世相聞人莫識也見其所著帽方屋而高因謂之方山子及軾謫黃過岐亭識之人始知其爲慥云

陳與義傳

陳與義字去非希亮曾孫天資卓偉蹕厲不羣能文致名譽流輩歛衽莫敢與抗登政和上舍甲科授開德教授遷太學

青神縣志

卷四十八傳

四十四

博士宣和中徽宗見所賦墨梅詩善之召對嘆爲見晚遂擢符寶卽尋謫監陳留酒稅遭亂避地湖襄泛洞庭上九嶷羅浮雖流離困厄而能以山川秀傑之氣益昌其詩高宋立召爲兵部員外郎累遷至翰林學士知制誥拜參知政事與丞相趙鼎同心輔政務尊主威而振綱紀從帝如建康扈蹕還以疾請授資政殿學士知湖州終提舉洞霄宮年四十九與義容狀儼恪不妄言笑外和而內剛薦士於朝退未嘗語人嘗問作詩法於崔鶼鶼曰工拙未論大要忌俗其所作體物寓興清邃紆餘高舉橫厲上下陶謝韋柳之間有簡齊集行

世

史母程氏傳

嗚呼余嘗得三卯錄讀之蜀禍之慘誠不忍言也夫史襁孫之死而復生也蜀民就死率五十人爲一聚以刀悉刺之廼積其尸至暮不死復刺之襁孫尸積於下暮刺者偶不及尸血淋漓入襁孫口夜半始蘓匍匐入林薄匿他所後出爲蜀樞密使嘗袒示人未嘗不泣下賀靖權成都錄城中骸骨一百四十萬城外者不計嗚呼推是考之益可悲者蜀眉州史氏由唐吏部侍郎儼從僖宗幸蜀因家焉其先墓在青神得

青神縣志

卷四十八傳

四十五

二十世宋世號名族其出蜀也今唯居湖州一房讀其遺事益悲之史母程夫人蘓文忠公之母族也夫人將携其家於峽江以橐金纏之兵暴至伏林莽與隣嫗謀曰輸金果可生吾兒無資不復能出蜀史氏誠無噍類矣縱得生日夕兵復至亦決死均死死以全史兒誠不憾嫗見身死爲吾出腰中金告兒使速走須臾兵果執母謝以實亡金遂遇害異日嫗語於鄰告史氏兒甫十三從草野得尸如其言窆以歸且亟圖其象識曰史光母年五十有四嘉熙二年十月二十七日申時死兵難兒遂東南來占籍湖州刻意自奮以右科爲淞

東兵馬鈐轄鈐生子主文任嘉定儒學教授在嘉定生子台孫介孫喜孫台孫儒術通史文復有子幾人而史氏繇嘉熙至於今且四傳矣噫蜀繇秦帝入中夏至於宋凡一千五百餘年文物太盛絕不知有兵革一旦掃削殆盡迄今百餘年遺墟敗棘郡縣降廢幾半可哀也已可哀也已

贊曰婦人內德不出門房中歌廢戰國而下俱不幸以著非得已也諱莫甚於死從容反覆烈士猶難之況士女乎歐陽公傳斷臂婦人以愧馮道夫人以死傳宗承平世澤於是乎見作史者烏得廢諸

青神縣志

卷四十八傳

四十六

杜莘老傳

杜莘老字起莘甫之裔孫徙家青神幼喜誦習蘇氏文不因時禁而罷登紹興進士教授梁山軍參政魏良臣薦主管禮兵部架閣文字彗孛見應詔上言此戾氣所生多爲兵凶之兆國家爲民息兵而將驕卒惰軍政不肅今因天戒以修人事思患預防莫大於此因陳時弊十事上以其議爲首命進一階遷敕令刪定官由太常寺薄升博士南渡後典秩散失顯仁后崩一時禮制有窳悉以古義裁定上問含玉之制莘老言此故實所不載請以周禮典瑞鄭元注製之及虞祭或

欲宰相攝行爭以古今無是卒正之遷祕書丞自蜀造朝不以家行清修獨處高宗甚重之擢監察御史以不畏疆禦升殿中侍御史首論天下多事陳俊卿在論思之地必有補益不可令解職而去上以爲然會議親征莘老贊上決策謂敵人欺天背盟當持以無懼勿爲微小利鈍所搖諛言所惰異議所惑則人心有恃而士氣可振又言宜不限早暮延見大臣謀議國事申敕侍從臺諫監司守臣亟舉可用之才及親征有期上言禁衛不肅羸老居半願亟留聖慮事皆施行所論劾皆符公論常謂臺諫當論天下第一事若有所畏忌姑

息不惟自欺其心且上不敬君故嘗極言無隱取眾所指目者悉擊去之論帶御器械劉旻筦禁中市易通北賈大爲姦利斥監嘉州稅又論知密院周麟之挾姦岡上避事辭難恐懼使金至於掩泣疏再上乃謫瑞州又疏幸醫王繼先十罪詔福州居住籍其貲彈內侍張去爲罷去而莘老亦以直顯謨閣知遂寧府結事金安節舍人劉珙封還制命改司農少卿尋請外仍與遂寧治郡課績爲諸郡最孝宗受禪進三議曰定國是修內政養根本尋卒年五十八莘老在言職骨鯁敢言咸稱曰杜殿院聲振一時無有所間

楊大全傳

宋史

楊大全字渾甫四川青神人登乾道進士調溫江尉攝邑有聲紹熙三年召監登聞鼓院會太學生龔曰章等百餘人上書以投匭爲緩必欲伏闕大全謂院以登聞名實明日達聰之地今乃使人視爲文具吾何言以尸此職乃自爲書以諫力請過宮疏凡三上其畧曰臣聞志於憂君者不畏義死不榮幸生不恥以言獲罪惟懼言不聽從自古大者身膏斧鑕次亦流竄四裔小者罷免終身未有若今日旣不免於聽從亦不加於黜逐徒餌之以無所譴呵之恩使皆饜富貴甘豢

青神縣志

卷四十八傳

四十八

養以消磨其風節平居旣皆貪祿懷姦之士臨難何有仗節死義之人自夏秋以來執政從官死者陛下皆不之信若建康趙濟武興吳挺今皆不虛然則畧有幾微見於朕兆者可不爲動心乎萬一或有蕭牆肘腋之變在朝之士瀝忠以告陛下復不信之必坐受其危亡矣今外間傳聞以爲壽皇將幸吳越此愛陛下之深欲泯其迹也陛下當亟圖所以解其憂者毋自壅其聰明疏入不報寧宗卽位遷宗正寺簿慶元元年易太常寺遷司農丞脩高宗實錄充檢討官有力薦爲台諫者韓侂胄聞其名欲見之大全笑謝不往乞外除知金

州聞命卽行時寶錄將上去不少待至姑蘇病卒

楊泰之傳

楊泰之字叔正青神人蜀名儒虞仲之子自少刻志於學卧不設榻食不知味者幾十載慶元元年類試調瀘州什邡二尉轉綿州教授羅江丞制司吳獵檄置幕府與論吳曦之亂曰若士大夫不從必不敢爲亂旣亂或能抗義猶將有所憚夫亂義之反也亂所以成士大夫爲之也獵竒之改知嚴道縣攝嘉定通判使者誣白厓砦將王壘寘於法坐註誤餘人於死泰之力爭不聽棄官去安丙薦之泰之名儒子當逆臣

之變勉有位者毋動使得尺寸之柄必能見危致命召赴都堂審察以親老辭父憂免喪改知富順監祿廩盡周鄰里又以千緡置義莊擢知普州以安居安岳二縣受禍尤慘力言於安丙乞盡蠲其賦改知果州諸邑畸零錢病民儲經費之贏爲對減之張義白實發其端泰之踵行之上於尙書請定爲式民歌之曰前張後楊惠我無疆理宗卽位趨入對言法天行健奮發英斷無牽於私意奪於邪說以救蠱敝以新治功本朝德澤邇來斲喪無餘民無恒心何以爲國方以直言求人復以直言罪之臣恐言路旣梗士氣益消浸成衰世之

風爲國者何便於此上竒其對擢爲工部郎中後言事者相繼皆自泰之發之遷軍器少監大理少卿紹定元年入對謂雪川風雨爲暴水潦潰溢此陰盛陽微之證至於巴陵陛下昆弟與其追恤於後莫若舉行於今詔直寶謨閣知重慶府爲書別丞相勸以急於用人去自私之心恢容人之度審取舍之權至官俗用大變俄主管千秋鴻禧觀卒所著有克齋文集論語解老子辭春秋列國事日公羊穀梁類詩事類名物編論孟類東漢三國志南北史唐五代史類歷代通鑑本朝長編類東漢名物編大易要言雜著凡二百九十七卷

青神縣志

卷四十八傳

五十

楊棟傳

楊棟字元極眉州青神縣人登紹定進士母憂服除辟西川節度幹辦公事入爲太學正父憂服除召試授秘書正字兼吳益王府教授遷校書卽密院編修入對言邇來中外之臣如主兵理財聽其言無非可用跡其實類皆欺誣上下相蒙無一可信惟陛下先之以至誠而後天下之事可爲也理宗說其言無何奉祠起知興化軍有孔子裔居涵頭鎮爲建廟闢田訓其子弟遷福建提點刑獄加直秘閣權知福州兼本路安撫使歷都官左右二司郎中尋兼玉牒所檢討宗正少

卿棟學本諸周程入對言臣所學三十年惟恃正心修身一說用之事親取友并治涇郡察冤獄至爲簡易時有女冠交通請謁棟言宜亟去之帝不謂然又言京襄兩淮四川殘破其餘郡縣多是兵將權攝科取無藝非陛下哀矜其民誰實寬之遷太常少卿起居郎知滁州改建寧御史周坦論其曩任成都制幕盡載激賞庫物先遁致陷丁黼塗炭生靈詔褫閣職提舉鴻禧觀似道入相登用故老起權侍左郎官崇正殿說書兼侍讀以集英殿修撰兼侍講出知太平州補闕蕭泰來論罷提舉興國官起知婺州度宗位東宮擢太子詹事進

賓客歷工吏二部侍郎同修國史兼中書舍人直學士院刑禮二部尙書國子祭酒景定三年加端明殿學士簽書樞密院事五年拜參知政事慧星見指以爲蚩尤旗人方議之或言棟■爲是言陰謀告帝以逐似道奪職奉祠台守王華甫建上蔡書院乞爲山主因卜居焉以資正殿大學士充萬壽觀使致仕卒遺表上輟朝特贈少保生平負海內重望人方期其大用乃蒙疑而去時論惜之所著有崇道集平舟文集從子文仲字時發七歲而孤母胡氏守節自誓教養諸子初以胄試第一入太學升上舍爲西廊學錄登寶祐進士母憂

從棟往問伊洛之學釋服調福州教授應運使印應飛辟以明嫠婦冤獄薦之荆湖宣撫趙葵署佐分司姚希得江萬里合薦以爲有用之學召任戶部架閣遷太學正殿國子博士勾外通判合州罷上元張燈移揚州不以牙契羨額擾民制使李廷芝檄主管機宜文字議行沙田力爭以爲不可召爲宗學博士輪對言春多沈陰二麥全癘洪水發於天目弄兵興於蘇湖將習黃金橫帶之娛兵疲赤籍掛虛之冗編氓得以輕統府警遽輒以憂朝廷設不幸事有大於此國何賴焉帝竦聽顧問遷太常丞權倉部郎官兼崇政殿說書在講筵

每以積誠感動嘗進讀春秋言仲尼尊王抑伯非爲徒然盖欲周王子孫率修文武成康之法度以扶持祖宗大業則王迹不熄西周之美可尋如此方副垂世立教之意時帝以疾連不視朝又奏聖訓有白絲竹之亂耳紫紅之眩目聲色之事元無可好苟得聖賢心學之指要以是而君國子民可以祈天永命貽謀燕翼大哉先訓是朝夕服膺帝爲之歛容盛夏建宗陽宮壞徙民居闐闐騷然文仲疏止之遷國子司業兼侍立修注官似道恕其多言又以救教諭彭成大迕意出知衡州運餉有法而民不擾以所當得米八千石立思濟倉

召爲秘書少監兼國史寶錄院遷太常少卿兼起居舍人蓋
帝立權工部侍郎兼侍右郎官給事中有事明堂議以上公
攝行文仲奏今祇見天地之始雖在幼冲比郎喪次已勝拜
跪執禮無違所當親饗時國事危急王爚陳宜中不協文仲
言祖宗所深賴億兆所寄命在乎二相苟以不協之故今日
不戰明日不征後悔何及尋兼國子祭酒常薦金華王柏天
台車若水皆名教所及至是柏與何基之諡皆所議定元軍
渡江畿甸震動朝士多棄去從班惟文仲一人無何疾益甚
勺祠以集英殿修撰知漳州因將家踰嶺南甫卒而來亡矣

青神縣志

卷四十八傳

五十三

有見山文集

明

余子俊傳

明史

余子俊字士英青神人父祥戶部郎中子俊舉景泰二年進
士授戶部主事進員外郎在部十年以廉幹稱出爲西安知
府歲饑發廩十萬石賑貸區畫以賞官不損而民濟成化初
所司上治行當旌者知府凡十人而子俊爲首以林聰薦爲
陝西右參政歲餘擢右布政使六年轉左調浙江甫半載拜
右副都御史巡撫延綏王銳爲巡撫請沿邊築牆建堡爲久

遠計工未興會銳罷子俊復言三邊惟延慶地平易利馳突
寇屢來犯獲邊人爲導徑入河套爲屯牧自是寇顧居內我
反屯外宿留重兵所費鉅萬猶未寧息莫若於沿邊築牆置
立堡砦今舊界石所在多高山陡厓依山形隨地勢或鏟削
或壘築或挑塹綿引相接以成邊牆於計爲便尙書白圭以
陝民困奏緩役旣而寇入孤山堡復犯榆林先後與朱永許
寧擊敗之是時寇據河套歲發大軍征討卒無功八年秋子
俊復言今因征套延綏屯士馬八萬芻茭煩內地若今冬寇
不北去又須備來年軍資姑以今年之數約之米豆需銀九

十四萬草六十萬每人運米豆六斗草四束應用四百七萬
人約費行資八百二十五萬公私煩擾至此安得不變計臣
前請築牆建堡詔事寧舉行請於明年春夏寇馬疲乏時役
陝西運糧民五萬給食興工期兩月畢事圭猶持前議阻之
帝不從命子俊速舉子俊先用軍功進左副都御史明年又
用紅鹽池搗巢功進右都御史寇以搗巢故遠徙不敢復居
套內地患稍息子俊得一意興役東起清水營西抵花馬池
延袤千七百七十里咸鑿崖築牆掘塹其下連續不絕每二
三里置敵臺崖砦爲巡警之所又於崖砦空處築短牆橫一

斜二如箕狀以瞭敵避射凡築城堡十一邊墩十五小墩七十八崖砦八百十九役軍四萬人不三月而成牆內之地悉分屯墾歲得糧六萬石有奇十年閏六月子俊具上其事因以母老乞歸慰留不許初延綏鎮治綏德州屬縣米脂吳堡悉在其外寇每輕騎入掠鎮兵覺而追之已不及故徃徃得利去自子俊徙鎮榆林增衛益兵拓城置戍攻守器畢具遂爲重鎮寇抄漸稀軍民得安耕牧焉明年移撫陝西子俊知西安時以居民患水泉鹹苦鑿渠引城西澇河入灌民利之久而水溢無所洩至是乃於城西北開渠洩水使經漢故城

達渭公私益便號余公渠又於涇陽鑿山引水漑田千餘項通南山道直抵漢中以便行旅學校公署圯者悉新之奏免岷河洮三衛之戍南方者萬有奇易置南北之更戍者六千有奇就戍本土岷州栗林羌爲寇子俊潛師直抵其所依山設伏羌覺而遁伏兵起追之羌大潰召爲兵部尙書奏申明條例十事又例上軍功賞格由是中外有所遵守緬甸酋卜刺浪欲奪思洪發貢章地設詞請於朝子俊言不宜許乃諭止之貴州巡撫陳儼等言播州苗竊發請調湖廣廣西四川兵五萬合貴州兵會勦子俊言賊在四川而貴州請討是邀

功也奏寢其事初子俊論陳鉞掩殺貢夷罪帝以汪直故宥之鉞多方構子俊於直子俊自危會母憂歸乃得免于俊之築邊牆也或疑沙土易傾寇至未可恃至十八年寇入犯許寧等逐之寇扼於牆塹散不得出遂大衄邊人益思子俊功服闋拜戶部尚書尋加太子太保二十年命兼左副都御史總督大同宣府軍務其冬還朝明年正月星變陳時弊八事帝多采納未幾復出行邊子俊巡歷宣大時請以延綏邊牆法行之兩鎮因歲歉而止比復出銳欲行之言東起四海治西抵黃河延袤千三百餘里舊有墩百七十應增築四百四

十墩高廣皆三丈計役夫八萬六千數月可成詔明年四月卽工然是時歲比不登公私耗敝驟興大役上下難之子俊又欲責成於邊臣而已不親其事謗議由是起至冬疏請還京帝入蜚語命改左都御史巡撫大同中官韋敬讒子俊假修邊多侵耗帝命工部侍郎杜謙等勘之敬又劾子俊私恩怨易將帥帝下兵部覆侍郎阮勤等爲白帝怒謙勤等命謙并按問而給事御史復交章劾中朝多欲傾子俊子俊危甚賴謙等平情按之還奏易置將帥如勤等言所費無私然爲銀百五十萬米菽二百三十萬耗財煩民不得無罪遂落太

子太保致仕去時二十二年二月也明年正月兵部缺尚書
帝悟子俊無罪復召任之仍加太子太保孝宗嗣位以先朝
老臣待之彌厚宏治元年疏陳四事已又上邊防七事帝多
允行后父張巒封壽寧伯子俊以封爵太驟疏爭之報聞明
年疾亟猶手削奏稿陳救荒弭盜之策甫得請而卒年六十
一贈太保諡肅敏子俊沈毅寡言有偉畧凡奏疏公移必自
屬草每夜分方寢嘗曰大臣謀國當身任利害豈得遠怨市
恩爲自全計故榆林始事怨讎叢起子俊持之愈堅竟以成
功爲數世利性孝友居母憂時令子寘母會試曰雖無律令

吾心不忍也當廕子移以廕弟子寘舉進士終戶部員外郎
寘就武廕爲錦衣千戶終指揮同知孫承勛承業皆進士承
勛翰林修撰承業雲南簽事

詩

宋

中巖尊者洞

蘇軾

額上明珠已露機那堪聖佛放頭低洞門不是無人鎖這鎖

還須這鎖題

石筍

端溪許仁

靈巖寺外石三峯曾說牛山有路通試向洞門問消息滿空

烟雨晝濛濛

石筍

祝旦

青神縣志

卷四十八詩

一

我愛壁立雙椽筆飽爾天漢之雲間欲寫錦江春色賦移至

瀘蓬筆架山

陳季常見過三首

青神人

蘇軾

仕宦常畏人退居還喜客君來輒館我未覺鷄黍窄東坡有

竒事已種十畝麥但得君眼青不辭奴飯白

其二

送君四十里只使一帆風江邊千樹柳落我酒杯中此行非

遠別此樂固無窮但願長如此來徃一生同

其三

聞君開龜軒東楹俯喬木人言君畏事欲作龜頭縮我知君
不然朝飯仰暘谷餘光幸分我不死安可獨

寄蔡子華

青神人

蘇軾

故人送我東來時手栽荔子待君歸荔子已丹吾髮曰猶作
江南未歸客江南春盡水如天腸斷西湖春水船想見青衣
江畔路白魚紫筍不論錢霜鬢三老如霜檜舊交零落今誰
輩莫從唐舉問封侯但遣麻姑更爬背

中巖韻

字致能號石湖吳郡人
宋淳熙中四川制置使

范成大

赤巖倚竚竚翠羅森成削岑蔚嵐氣重稀間暑光薄聊尋大

青神縣志

卷四十八詩

二

士處徃叩洞門鑰雙撐紫玉闕中矗翠雪幄應供華藏海歸
坐寶樓閣無法可示人但見雨花落不知龍湫勝何似魚潭
樂夜深山雨來人靜天一握驚看松桂白月影到林壑門前
六月江世界塵漠漠寶瓶有甘露一滴洗煩濁捫天授斗杓
請爲諸君酌

中巖韻

山靈知我壓塵土喚起蟄雷塵午暑松風無力雨絲長散作
毵毵雪塵舞巖前懸掛珠簾傾安得吹來添玉觥詩成酒盡
腸亦斷休喚佳人唱渭城

酌別次陸務觀韻 二首

送我彌旬未忍回可憐蕭索把離杯不辭更宿中巖下投老
餘年豈再來

其二

明朝真是送人行從此關山隔故情道義不磨雙鯉在蜀江
流水貫吳城

再韻答劉文潛司業 二首

平羌江上首空回慈姥巖前定把杯縱使石腸都忘却也應
風雨送愁來

青神縣志

卷四十八詩

三

其二

回廊月下短歌行惟有知音解有情一曲紅窻聲裡怨如今
分作兩愁城

訪借景亭

山陰人字務觀號放翁宋
淳熙中四川制置使參議

陸游

造朝下白帝懷古遊青神城頭三間屋聊得岸我巾元佑太
史公世寧有此人瘴烟侵玉骨老作宜州民至今杖履地來
者猶酸辛密竹剪已空喬木亦半薪陂池獨渺然中有鷗鷺
馴人生能自足一尉可終身三嘆下城去檣旒春江津

晚泊慈姥巖 二首

慈姥磯頭月纖纖照酒杯素秋風露重久客鬢毛催宿鳥驚
還定飛螢闔復開平生四方志老去轉悠哉

其二

山斷峭崖立江空翠靄生漫多來往客不盡古今情月碎知
流急風高覺笛清兒曹笑老子不睡待潮平

中巖石笋

壁山進士
丹陵縣令

馮時行

古院無人僧作佛碧潭有水魚化龍當年諾巨小遊戲一石
擊碎成三峯

輓杜莘老殿院

三首

青神縣志

卷四十八詩

四

流落杜莘老平生一飯忠大賢宜有後異代果生公文艷神
藜燭露蹄御史驄九原呼不起蕭瑟栢臺空

其二

親擢逢明主臺剛振一時觸真同獬豸問不到狐狸姦佞已
落膽江湖甘抱靡賢哉郭有道無愧蔡邕碑

其三

我昔遊三館聞公論立朝端如平日語果不小人饒

公每云
某饒君

子不饒
小人

節義真齊固年齡不逮喬英魂已天上楚些詎客招

中巖寺

范鎮

巖雨晴猶滑溪泉直復紆傾崖日眩轉亂石步崎嶇

題青衣飼蠶古詩

養口資財賴以桑終成王道澤流長抽系不羨蜘蛛巧飼葉
頻催織女忙三起三眠時運化一生一死命天常待看獻繭
盆繅後先與君王作袞裳

明

次唐王勃元武山聖泉詩

余子俊

青鞵布襪陟層嶺望道其未及泉天近尋常塵不到旬當
十四月猶弦山花亂落誰爲掃野鶴相隨或在老我重來

青神縣志

卷四十八詩

五

應指日山靈珍重護寒烟

送楊升菴客還滇南

余承勛

子雲辭天祿南走哀牢鄉稽首謝閭闔御恩不敢忘策馬達
天津張帆度飛梁孤劍伴衾枕洞庭與瀟湘鵬賦揮賈涕鳳
歌激楚狂幽蘭被九畹采采不盈筐五月冒瘴氣異哉驅逐
強問俗邁牂牁至止滇之陽卉木麗繁輝山海搖晴光復有
好奇士摳衣來門牆濯泉選碧玉嚙雪搜點蒼城飛花霧煖
寺入松風涼飯兒資海貝晏客傳檣榔可惜昆明旅可憐詞
林望蹉跎成白首艱苦斷柔腸金鷄豈不赦奈何數乃妨暫

以奉戎役趨過桑梓旁青冢咽烏號荆樹悲鴻翔萬物遂施
化穹昊湖茫茫夙夜懷徃義秉燭理行裝邂逅青衣浦勸進紫
霞觴歷歷歲月馳悠悠道路長袂連意俱愜鬢改情各傷抱
憂予局促戒遠君徬徨徬徨聽我歌浮生焉用忙潮州非魍
魎白也流夜卽折木感姬旦撫髀思馮唐神劍有時合良璧
豈終藏騏驥食弗飽荃蕙性本芳詹尹不能卜顏壽彭乃殤
天運詎如此窮達未可量努力崇令德萬禩仰文章養雛學鳳鳴
挾飛覽遐荒金馬舊梧竹翩翩雲錦裳歌罷轉遲暮棹日下
平羌江鳥舌初巧江柳眉色黃離別在須臾後會擬何方夢

青神縣志

卷四十八詩

六

中見顏色尺素遙爲將

中巖留別余芳池草池

翰林
修撰

楊慎

又別中巖二十春禪枝慈草幾昏晨三生水月淹流地萬里
江山感慨身楚澤羈纒吟北渚謝家兄弟餞南津酣杯且喜
朱顏在覽鏡休驚白髮新

中巖

余子俊

步入中巖日已斜老僧錫杖入烟霞呼童淨掃維摩石留客
頻煎石笋茶寶鼎香烟添栢子膽瓶春色上梅花倚欄看罷
三峯笋始信招提景最嘉

游龍池寺

余承勛

萬壑陰森玉樹林桃源春洞任追尋
移杯露砌寒蘿幌倚杖鳴谿奏石琴
鶴唳雲巢驚客夢龍開鉢水照禪心
天虛古殿昏鍾處清楚泠泠落翠岑

游三巖

余承勛

良夜嘉招遣驛來携壺江寺共登臺
天連遠樹晴嵐合鍾動虛樓曉霧開
洞口聽泉頻憇賞筭恨刻句漫啣杯
閒中把贈空雲霧笑倚春巖折野梅

遊中巖次草堂韻

王一麟

青神縣志

卷四十八詩

七

莫言此處非幽僻隔斷塵囂有綠流
臺外無山何礙月樓頭不雨亦生秋
烟開萬象波中浴雲聳三峩天際浮
勝地祇須騷客至閒來笑挈一樽遊

水月樓

王一麟

水自峩村發月經玉斧栽一現潭底影
水月共徘徊峩峩數楹閣閣勢何巍巍
憑欄看雙清勝賞愧天臺煩囂日汶汶
臨此絕纖埃酒婪携來甕愁圍種種開

中巖

王文傑

殷勤携杖訪禪關遠在城南第一山
徑草翠搖鸚鵡綠林花

紅點鷓鴣班嵐開秀嶺濃於書雲散清溪曲似環更向三峯
高處望天臺風景隔人間

石鼓寺

二首

失名

石鼓沉兮石記鐫獨留風景在眉山花連舊地頻開路燕引
新雛任去還風過樓臺清氣爽雨餘巖壑伴幽閒老僧感激
君相待特置蜂房半坐間

其二

一樽何處可相携石鼓山前路不迷黃鳥逐人歸畫幃青雲
隨步上天梯老僧置椅忙留坐小衲烹茶旋汲溪出遇野農

青神縣志

卷四十八詩

八

迎馬首雨中含笑話耕犁

中巖寺二首

偶尋尊者控瑤臺澗葉迎秋撲面來雲破二峩橫二曜月明
三筭接三台遊魚定水驚綸沒拂鷲香風逐嘯開直到諸天
無盡處鍾聲潭影共徘徊

其二

跨鶴仙人海上來中巖鎖鑰白天開繽紛劍氣通西極縹緲
星辰落上臺好向維摩談妙句還將石筭煮蓬萊頻虛一笑
諸天外吹盡烟荒萬里埃

謝嗣

余子俊

敬向瑤台拜至尊
仗邀佛力產麒麟
歷年祈禱神相應
累代香燈祝更勤
箕箒事業憑今續
袍笏家聲賴後昆
始知積德多崇報
轉盼紗籠宇不塵

中巖

余青野

二十年前扣此關
重登偷得片時閒
烟籠高樹還成雨
雲護喬林不見山
絕頂祇容僧掛鉢
隔溪漫聽水流灣
天機索我詩鑄石
醉墨淋漓不用刪

三巖

郭子章

青神縣志

卷四十八詩

九

三寺莊巖倒壁懸
諸峯迴合繞青蓮
松號石峽龍吟雨
茶煮玉泉鶴避烟
洞口穿雲尋鬼谷
江頭渡月問僧船
青神已下王喬履
慈母相逢說又玄

遊三巖寺

呂調音

寺避烟霞裡僧歸
虛漢中苔文封石
綠泉竇與山通好
鳥迎人媚幽光向日
融梵王空法象兜
率儼珠宮聽喚魚
雙出依雲水一叢
憲臺能養晦金馬
自高風追步憐余
晚留題愧眼空吏
情渾淡薄逸興竟
何窮

中巖次韻

余承業

新水侵晨發青霞流棹中魚鳥自迎翔石竅鳴泉通使君挺
道氣藻緒偕冲融既穿紫霞徑復坐金蓮宮香篆生烟曲午
陰轉壑叢命酌延幽賞披襟來薰風引盼諸天靜撫心萬象
空追陪酬夙慕良緣應未窮

除夕

余楫

放浪無終極看看歲又更貧懷生倉卒心事亦無徵促酒不
成酌歛衣空復情蕭槭無人喻振策倚前楹孤哀原有屬双
眼未全清汗漫肆情志暫遣憂思屏回首念妻孥豈禁心鬱
憎悲來不可遏我生相營營

青神縣志

卷四十八詩

十

其二

營營亦何爲悽惻不礙道幸恃心潔清可以對蒼昊一身經百
折堅貞聊相保偪側履荒途何暇計温飽昔也居京華有如魚
在藻今者嘆流離不及安枝鳥有酒且賦詩塵氛迹如掃不
學裴晉公擁爐嘆衰老

元其三

今晨氣宣朗檐次透曙光春風扇和柔悠悠襲我裳道院自
幽靜中庭焚異香香氣何氤氳隨風泛長廊我本羈旅人感
此歲月長孤踪謝塵事靜坐閱班揚濡毫改舊詩開樽引巨

觴磅礴無拘束頽然入醉鄉天地氣候改陽和易冰霜草木
漸勾萌梅花何處芳幾欲探消息林水空蒼茫翹首憶江南
雲霞蔚於望

古中巖

王一麟

數里陰濃一徑幽誰知山郭有蓬邱藤牽絕壁頭陀眾苔蝕
歛崖古篆稠風送泉聲驚夢蝶雲生洞口起潛蚪日高正是
閑僧睡兩寺鍾鳴尙在樓

上巖

盤空石磴臨危閣萬象森羅始獻竒懸壁苔生迷鳥指遠山

青神縣志

卷四十八詩

十一

雲去出峩眉佛臺地僻月斜照石笋風吹花倒垂移履再尋
僧定處芬芳眾草結幽帷

南巖

王一麟

巖危寂寞處衆草崎嶇徑佛事務清修人寰定競勝僧歸狎
鹿隨風靜栖禽定日暮禪未醒月華生夕暝

玉泉坎

王一麟

崖竇落瓊漿崖懸詩雄峭掬飲夜生涼細看聲律竅千古石
室幽泉與詩爭曜再有人和音能協虞韶調

羅漢洞

王一麟

浪聞飛錫透事杳識人稀花發含春笑雲重叩夜扉龍眠幽
窖老蝙蝠飲乳泉肥栖迹欲來此虛無道隱微

秋日登中巖

羅 瑤

乾坤何處不淹留況有中巖最上頭使節暫停江日靜禪關
徐步野雲浮玉泉清飲三山水可無乘月泛扁舟
同王少參年丈登中巖時萬曆乙酉元霄後八日

赫 瀛

紅雲踏破自天來眺望招提紫霧開湧地玉泉流九曲插天
石笋接二臺峻嶒梵宇疑西竺碑碣巖岑駕島萊暫息慈航

青神縣志

卷四十八詩

十二

禪境靜清幽無處惹塵埃

遊中巖

二首

爲攬中巖萬里來竒峯疊疊畫圖開平生慧劍空三界此際
仙槎泛九臺水月樓頭浮晝夜玉泉池上小蓬萊雨花飛入
長松去不落人澗半點埃

其二

性僻從來愛十洲中巖窈窕亦竒遊秋容老我堪行住物色
隨人可應酬滾滾長江飛客舫森森遠樹隱禪樓名公雙刻
驚人語讀罷烟雲五色浮

遊中巖喚魚池

赫瀛

洞天深處煙霞滿金碧叢中一逕長崖上舟飛惟虎伏源頭
活潑祇魚藏水涵皓魄搖銀海月侵樓台疑曉霜羽化仙人
千載去至今遺石卧溪傍

答草池約泛芙蓉溪

余承恩

春來花鳥總關情夜雨愁聽不到明怪殺主人猶病酒晴江
鼓柁放舟行

芙蓉溪泛舟

余承恩

芙蓉溪水三尺強蒼蒼兩岸草花香若待長江新漲合撐舟

青神縣志

卷四十八詩

十三

直上小茅堂

遊三巖

余承業

諸天懸絕壁鐘洞片雲齊楓落驚猿夢松間許鶴栖竹林留
客密漁火望中迷獨卧蒼洲晚佳遊是孰携

喚魚池

蔡挺

喚魚自昔羨坡公今古雖殊興致同我到池邊還拍手風流
未分讓髯翁

石筍

余青野

石筍分枝不計年牛頭當日事猶傳距那一段真消息留與

中巖作福田

春日中巖次韻

余承恩

春巖若翠晝陰濛草樹微茫接遠空
紺閣鳴鐘傳靜壑琅函
翻貝散香叢啜來新茗分江杓
調入浮雲破月籠把酒對君
談往事匣中短劍敢稱雄

步前韻

失名

雲黯春山小雨濛三巖擁翠入層空
玉泉有水流九曲石筍
無根自一叢狂興偶思青靄散
醉吟何意碧紗籠橫江獨立
天無際西蜀名山此一雄

青神縣志

卷四十八詩

十四

步前韻

失名

間登仙界接鴻濛峽轉巒迴入半空
風送溪聲來竹裡鶴翔
雲影過松叢幾年遊宦如浮夢
半日偷閒似出籠佳景故應
詩點綴臨春高調屬才雄

步前韻

劉儒

中巖絕頂霧溟濛到此方知色是空
且解塵纓脫宦海暫隨
遺跡訪仙叢穿雲洞口元猿嘯
對月峯頭紫氣籠贏得一聯
清意味浮名不繫是豪雄

步前韻

余承勛

春日登臨霧雨濛濛丹樓石笋交摩空猿啼修竹蔣詡逕雀啄
新蘭陸羽叢結想烟霞脫飛鳥驚心鳴鶴窺樊籠碧山一卧
遂回首自愧著書非揚雄

步前韻

張拱文

春深淑氣曙濛濛掉入江風天際空傾盖每尋三笋約流觴
重泛百花叢潭魚聽喚非貪餌山鳥高飛豈受籠好景撩人
清興發不知世外角雌雄

步前韻

失名

靈巖春入氣溟溟石筍嶙峋插太空風送松聲來梵宇日將

青神縣志

卷四十八詩

十五

花影度林叢因思民瘼成丹訣謾檢參苓滿藥籠回首青江
春未晚一聲長嘯興豪雄

步前韻

春山春曉春霧濛濛傾倒詩筒薄太空龍珠臺畔白雲住牛耳
巖頭紫氣叢好景拾來拴意馬高懷到處繫心籠三君更進
春同酒盡掃俗障真英雄

康令君邀遊中巖

二首

碧笋競摩空中巖一逕通劫灰輪轉後僧定剎那中怪石纍
蹲虎葛藤卧老龍雲村□□玉鑰幾時逢

其二

石佛莊嚴地春花爛熳餘澄心觀止水拍手喚遊魚妙理誰
能詰禪機只自如權同濠濮想相對且躊躇

季冬遊中巖

顧汝學

兩到中巖興若何今朝遊興似偏多雲間忽有仙鳧下林外
欣逢老衲過寒翠半空飛厦閣輕烟十里繞松蘿徘徊不盡
探幽意遙聽江樓起棹歌

長至前三日邀遊中巖

周伯思

選勝中巖帶雨來登臨未了兩峯開層巒雲鎖藤蘿古笋石

青神縣志

卷四十八詩

十六

山分星斗堆山遠泉流池九曲潭深魚躍水千洄徘徊不盡
烟霞意漢篆秦碑掛綠苔

遊中巖

栖霞拖元癖結構三巖中使旌枉結夏篠逕迴泉通笙磬發
靈籟披襟梵氣融結讌咨幽討散帖青蓮宮石笋護龍籜巖
芝揚鳳叢三車沾法雨五馬歌清風萬景來澄霽寶相藏色空
懿此布金地參差那可窮

遊中巖

失名

諾詎何年鎮此關登臨頓覺此身閒笋峯屹屹清高嶺蘭谷

巖巖疊遠山虎伏蒼苔松滿徑魚遊碧澗水旋灣欄杆倚遍
饒清興謾把新詩次第刪

遊中巖

絕壁超塵界幽泉出上方氣分天酒澹味挹石脂香陸羽題
應遍相如渴更長解瓢聊一飲不乞漢蒸嘗

皇清

遊中巖

四川學政

葛俊起

輕帆乍卸指林邱載酒聊爲覽勝遊曲徑修篁穿蛺蝶垂蘿
古樹掛獼猴泉飛赤壁空中落雲起瑤台象外浮更有竒峯

青神縣志

卷四十八詩

十七

插天漢人間何處訪瀛洲

和遊中巖三首

不愧名山眾口稱題詩兩度記吾曾月宜石笋風邊照石笋

三峯其下有太極泉雲自珠泉穴上騰世外舊遊嘗入夢眼前新句老

爲興蒼崖古木猿啼處杖策何時問老僧

其二

山光十里不容稱想像烟嵐得未曾躍鯉聞呼驚撥刺老猿
掛樹喜超騰雨殘林外晚風濕日照崖端薄霧興可惜豐碑
都寂寞何年孟鉢住高僧

其三

冷落荒台幸有稱尋遊騷客竟何曾溪橋路曲縈紆上禪榻
雲開歡喜騰丹障陸離回晚照烟鬟綽約看晨興四時好景
知何限試問花台說法僧

雜咏十八首

青神
縣令

吳汝翼

境闢蠶叢古南安事迹微農桑今已徧猶是說青衣
錦江從東來濛水承其委翹首望烟霄三山如可指
郭繞魚陀水城蟠馬耳山我來尋舊路但聽水潺潺
水向中巖落蘇公寄興長行人江畔去指點是平羌

青神縣志

卷四十八詩

十八

白菓波流急紅花水勢洄渡頭人伫立都待放船回
啞漣稱絕險觸石起狂瀾旅客驚相告南行第一灘
五渡乘流便無人舟自行芙蓉開更好兩岸踏花英
仙池流夜月古閣起清風更訝三山笛聲聲度遠空
東郭水溶溶猶龍此地逢關中瞻紫氣橋畔識仙蹤
三巖號名勝彷彿似蓬萊石笋當空迸魚羣鼓掌來
長泉傳舊里曾說見麟麒建院煩王衍休祥恐未真
四時多好景恰問何人借山谷有遺詩悠然明月夜
石壁何嶙峋清泉流不息爲欲引流觴鑿池成太極

方山甘隱逸莘老稱骨鯁出處有殊途芳名千古炳
歷伐經沿革遙看襟帶長岷江通地脉峩嶺接天光
竹樹連千畝人民集五方不堪談往事多半是荒唐
遇雨留滯土主廟因題壁上

吳汝翼

殘雨翛翛映彩虹憐君獨詠楚臺風遠江帆影秋浦外故苑
砧聲响夜中壯歲漸如辭幙雁間身猶作蠹書蟲雅音自古
無能好莫向人誇瑟最工

鴻化堰告成口占誌喜

青神知縣

林鴻

十年簿書○八載營堰可勞勞之益動而巽汨汨泱泱潤我
畦畎口占雁夸用志相勸

青神縣志

卷四十八詩

十九

鴻化美名唐肇興何年淤塞變爲陵陌阡度越空惆悵誰築
離堆訪李冰

相肱切

并泥不食心還惻况汲巨波受福宏細玩勞民勸相業敢辭
汨沒已無徵

曾搜志乘查無憑識得渠名不識形剝復循環真鼎革桑田滄

海自分明

故溝尋出

尋源不用道元經惡鑿敢將禹智營料得天心多暗獲故教

鴻化應鴻名

龍門紆折派無窮瀟至坎流繞學宮記得當年祈濬決天衢

雲影路潛通

不言所利利斯美以費惠民惠豈周安土由來多顛戚及泉
棄井散云休

八載相觀八載憂脛毛憔悴爲誰求於今逝彼百泉注試問
青疇汪濊不

孰殺興歌幾莫辭誰將伏道解傳之俟君十載無遺愛洒却
寒泉處處瀾

遊中巖

林 鴻

聞說中巖號小峩薄書十載幾曾過喚魚須念魚頰尾伏虎

青神縣志

卷四十八詩

二十

何如虎渡河太極融來心是佛穿雲時出幻非魔靜觀自得
皆邱壑□事逃禪叩鑰哦

重遊中巖寺

顧汝修

靈隱寺外一泓泉飛來峯石清且研雲栖寺外五里竹寺門
乃在山之麓西湖湖山海內稀兩寺林泉夢欲飛永懷故國
中巖寺心自品題分軒輊歸來返棹及青神江邊葱蒨向人
親石橋省是舊時路流水潺湲蔭綠筠徜徉初得喚魚池坡老
風流真吾師孤雲來往穿雲洞丹崖懸乳滴珠垂何年甃石
爲太極泉以此名固其宜迤邐再過玉虹北石筍三峯何特

竒梯筍捫參瞻古殿四百年前彼一時前度題詩興未敗雙
壁飛嵐上衣帶指點却從何處來磴路都隱藤蘿外大壑蜿
蜒走生蛇古樹高擎鬱如盖巫峽從來多猿啼跳躍叫號此
其最巨羅尊者開道場雁宕龍湫知可汰吁嗟乎古人碑碣
總模糊天風吹袂一長吁白骨半驚秋井塌謂石不朽石何
如

謁三蘇祠

馮廷鋈

夙昔尙論古景仰在芳矩眉陽三先生文行疇與伍前歲令
青衣幸得謁祠宇衣冠肅一堂宛然步鄒魯穆穆高山岑森

青神縣志

卷四十八詩

二十一

森清江浦風標去我遠何由躡其武縱有堦前柏撫摩終無
補亦有池中蓮懷人情更苦君不見峴山之崇碑淚墮羊公
枯又不見成都之草堂憑弔杜公甫物是人已非空餘一坏
土何如明窓裡薰香讀公譜

春日登城望青衣江

程尙濂

黃鹿真人飛上天蠶叢遺跡如雲烟子規啼竹竹欲裂夢中
夜夜聞清猿山城老屋飽霞翠鷄犬疑在雲中暄登撫懷古
坐敞罔但聞青衣江水鳴濺濺借景亭清風閣兔葵燕麥春
如昨安得雲璈小鳳笙一聲吹下瑤池鶴

眉州道中

程尙濂

眉山天下秀黛色披衣襟日射玻璃江水底明碎金嵐翠列
屏障巖霏幻晴陰安得謝公屐攀蘿重幽尋仙人如可期遲
我白雲岑

墓頭山

程尙濂

墓精不蝕月幻此嶙峋碧大肚何婪酣一吸江流窄爬沙豈
云鈍踞地無形迹頤中應有物淳泓貯靈液白蠚與紫芝雲
扃悶幽寂

遊中巖

青神縣志

卷四十八詩

二十二

松篁幽寂鳥相呼臺殿參差乍有無一徑盤將梯勢窄三峯
抽作堦形孤名垂早記黃山谷碑斷曾詩范石湖較北峩眉
先入手青衣江上酒頻沽

許國極井研人也性好義善種植凡遠近文廟柏樹皆力任
之青神亦資其惠焉乙卯予因明經諸君子之請贈以種樹

留芳四字表其廬
并繫以古風一首

井研布衣許國極世業田疇食其力平生慕義樂捐施每向
巖宮事培植豈惟利在桑梓間不以隣封判畛域青神聖廟
久荒蕪爲栽翠柏紛成行轉瞬三秋飽風雨霜後黛色驚蒼
蒼吾聞樹人猶樹木十年百年異遲速許子何爲不憚煩非

以沽名並邀福要知天道有報施作善貽謀自式穀

遊中巖和明人刻石韻

陸滋

絕景登臨興若何深林曲徑綠陰多是誰竹裡敲棋罷有客
江邊載酒過澗聽新泉穿石壁山尋古逕入烟蘿西風蕭寺
增秋色高踞雲巔發浩歌

續青神道中望峩眉山

董貽清

平生雅識看山趣十丈紅塵苦縛住峩眉山下宦經年未到
峩眉最高處竭來仍走青江道山容如舊人容老山神憐我
夢魂勞特開一角浮雲曉初如旭日懸層光金輪五色陽烏

青神縣志

卷四十八詩

廿三

翔繼疑蜃氣現樓閣玉女面面開晴窓我欲從之朝帝闕天
門軼蕩羣仙揖左駕青虬右鳳皇半途橫被罡風折喚魚池
畔聲不聞蘇公手跡今猶存獨惜先生富笠屐黃州雨雪登
州雲判杭知穎瓊儋謫海外猶留鴻爪跡咫尺家山竟未登
千古峩眉笑岑寂乃知山水平生緣一游一覽非偶然公如
魂魄猶戀此相與芒鞋竹杖躋其巔

留別青神士民

象耳墓頤秀環江小縣開斯民猶直道瘠土本多材康節匡
時彥林宗作賦材一言堪報最得士盡澹臺

翻笑清貧吏歸裝有鶴琴敢云飲水節祇是在山心綠愛間
庭草青留上舍襟玻璃江畔路何處有棠陰

青神縣

荒城重到黯銷魂十室曾無一室存人血未乾腥在壁鬼燐
欲嘯閃當門狐狸白日遊城郭父老蒼顏哭子孫振卹凋殘
原素志關心况有故候恩

送郭藕舫太守之任皖城

郭輔元

殺運東南劇烽煙及趙韓郡人如望歲羣盜尚探丸心簡承
珠渥胸兵蘊鬱盤一麾臨皖水五馬出雲安遠岸驚濤拍中

青神縣志

卷四十八詩

二十四

流擊楫歎飛鴻迷澤堵畫鷁駛江灘訟舍棠陰在離筵竹葉
乾滄波情縹緲舊雨淚汎瀾顧我猶蓬轉送君增露寒未隨
鞭鐙去都作梗萍看或返嚴公節重彈貢禹冠將心感知已
萬里認翔鸞

題俞麟士太守凌雲載酒圖

佛前江水搖醺醖佛頂江樓引盃杓坡翁一去八百年載酒
何人繼芳躅漢嘉太守今循良耽遊一鶴隨翱翔出門手挈
幾桃李相與策杖登高岡醒狂恐被山靈笑酒携卽筒暢吾好
遙揖峩眉入綠樽放開詩膽凌蒼昊樹人樹木情維均此意

迥出千尋塵不令風雅久淪替要使人物歸熙春左司卧閣
乘清晏束絹相遺寄真面披圖猶帶斷雲流拂紙如傾醕醴
醜勝概高情媿往賢潑醅大叫呼髯仙人生此樂難再得請
君更置沽酒錢

青江晚眺

滕國賢

唱徹大江東關河一望中天開雲吐月山穩樹搖風釣隱藏
佳士詩名出醉翁晚霞情更好長戀夕陽紅

中巖游

穩着游山屐山山印綠苔禪花和藥種僧笠戴雲回石笋霞

青神縣志

卷四十八詩

廿五

烹熟流杯酒醉開池魚猶可喚拍掌待吾來

其二

直上三峯去烟霞蒲屐生禪心來寺定幽谷應鐘鳴佛洞雲
穿破仙床夢不驚泉流高下响想見在山清

游中巖遇雨

踏破烟霞路尋碑曳杖行濕雲堆寺重熟菓墜崖輕雨過山
增色風高樹有聲東坡遺屐在我欲借先生

慶源宣義王丈以累舉得官爲洪雅主簿雅州戶掾遇吏民
如家人人安樂之既謝事居眉之青神瑞草橋放懷自得有

書來求紅帶既以遺之且作詩爲戲請黃魯直秦少游各爲賦一首爲老人光華

蘇軾

青山半作霜葉枯遇民如兒吏如奴吏民莫作官長看我是識字耕田夫妻嗚兒號刺史怒時有野人來挽須拂衣自注下下考芋魁飯豆吾豈無歸來瑞草橋邊路獨游還佩平生壺慈姥巖前自喚渡青衣江畔人爭扶今年蠶市數州集中有遺民懷袴襦邑中之黔相指似白髯紅帶老不癯我欲西歸卜鄰舍隔墻拊掌容歌呼不學山王乘駟馬回頭空指黃公壚

青神縣志

卷四十八詩

廿六

分明表出陽城何易于一輩人物非此筆力莫能傳其人王直方詩話曰與王慶源詩起六句山谷云庭堅最愛此數韻

林子仁曰謹按蘇叔黨所作王元直墓表云初李父慶源官於雅州以論事不合取官長怒卽謝病去詩中云刺史怒指此